

## Ahemfo Nhoma A Eto So Abien

### *ɔhene Ahasia Adebiṣa*

<sup>1</sup> ɔhene Ahab wu akyi no, Moabman tew wɔn ho fii Israel ho, nyaa wɔn ahofadi. <sup>2</sup> Da bi, Israelhene foforo Ahasia fii n'abansoro dan a ewɔ Samaria ahemfi mfensere mu tew hwee fam, ma opiraa yiye. Enti ɔsomaabɔfɔ kɔ Baal-Sebub\* Ekron nyame nkyen abisa, kobisaa se obenya ahoođen ana.

<sup>3</sup> Na AWURADE bɔfɔ ka kyereɛ Tisbini Elia se, "Kɔ na kohyia Samariahene abɔfɔ no, na bisa wɔn se, 'Aden nti na morekɔ Baal-Sebub, Ekron nyame nkyen abisa, se ɔhene benya ahoođen ana? Onyankopɔn nni Israel ana?' <sup>4</sup> Mprempren, senea Awurade se ni: 'Worensɔre mfi mpa a woda so no so da. Na nea εbeyε biara, wubewu.' " Na Elia kɔkaa nkra no.

<sup>5</sup> Bere a abɔfɔ no san baa ɔhene nkyen no, obisaa wɔn se, "Aden nti na moaba ntɛm saa?"

<sup>6</sup> Wobuae se, "ɔbarima bi behyiaa yen, ka kyereɛ yen se yensan nkɔ ɔhene nkyen, na nkra a ɔde fi AWURADE nkyen a ɔde kaa ho ne se, 'Aden nti na morekɔ Baal-Sebub, Ekron nyame nkyen abisa se ɔhene ho bɛtɔ no ana? Onyankopɔn nni Israel ana? Esiane se woayε saa nti, worensɔre

---

\* **1:2** Baal-Sebub nkyerɛase ne "nwansena wura." Saa din yi ye fewdi din bi a wɔde too Kanaanfo nyame Beelsebul (honhommɔne hene ba) so a ewɔ Mat 10.25; 12.27 no.

mfi mpa a woda so no so da. Na nea εbεyε biara, wubewu.”

<sup>7</sup> Ḷhene no bisae se, “Na saa ɔbarima no yε hena? Na ɔte dεn?”

<sup>8</sup> Wobuae se, “Na ne ho wɔ nwi a ɔbɔ aboan-woma abɔso.”

ᶮhene no tεεs mu se, “Eyε Tisbini Elia.”

<sup>9</sup> Ḷsomaas asraafo so safohene ne asraafo aduonum sε wɔnkɔkyere no. Wohuu sε ɔte bεpɔw bi atifi. Ḷsafohene no ka kyεrεs no se, “Onyankopɔn nipa, Ḷhene asoma yεn sε yεmmεfa wo mmra.”

<sup>10</sup> Na Elia buaa ɔsaahene no se, “Sε meyε Onyankopɔn nipa de a, εno de, ma ogya mfi ɔsoro mmra mmεhyew wo ne wo mmarima aduonum no!” Na ogya fi ɔsoro bekunkum wɔn nyinaa.

<sup>11</sup> Enti Ḷhene no san somaa ɔsafohene foforo a asraafo aduonum ka ne ho. Ḷsafohene no ka kyεrεs no se, “Onyankopɔn nipa, Ḷhene se bra mprempren ara.”

<sup>12</sup> Elia buae se, “Sε meyε Onyankopɔn nipa de a, εno de, ma ogya mfi ɔsoro mmra mmεhyew wo ne wo mmarima aduonum no!” Na bio, ogya fi ɔsoro bekunkum wɔn nyinaa.

<sup>13</sup> Bio, Ḷhene no somaa ɔsafohene bi ne asraafo aduonum. Saa bere yi de, ɔsafohene no kobuu Elia nkotodwe. Ḷsεrεs no se, “Onyankopɔn nipa, mesrε sε, fa me ne saa asomfo aduonum yi nkwa kye yεn. <sup>14</sup> Hwε sεne a ogya fi ɔsoro abεhyew akuw abien a wodi kan no. Nanso mprempren mesrε sε, fa me nkwa kye me!”

<sup>15</sup> Na AWURADE bɔfo ka kyεrεs Elia se, “Nsuro. Wo ne no nkɔ.” Na Elia sɔre kɔɔ Ḷhene no nkyεn.

<sup>16</sup> Na Elia ka kyerεε ɔhene no se, “Sεneā AWURADE se ni: Aden nti na wosomaa abɔfo kɔɔ Baal-Sebub, Ekron nyame nkyεn abisa, se ɔhene benya ahoɔden ana? Onyankopɔn nni Israel ana? Esiane se woayε saa nti, worensɔrε mfi mpa a woda so no so da. Na nea εbεyε biara wubewu.” <sup>17</sup> Na Ahasia wui sεneā AWURADE nam Elia so hyεe no. Esiane se na Ahasia nni ɔbabarima a obedi n’ade nti, ne nuabarima Yoram na odii n’ade se ɔhene. Saa asεm yi sii Yehosafat a na ɔye Yudahene babarima Yehoram adedi mfe abien mu. <sup>18</sup> Nsεm a esisii wɔ Ahasia ahenni mu no nkae no, wɔankyerεw angu Israel Ahemfo Abakɔsεm Nhoma no mu ana?

## 2

### *Wɔfa Elia Kɔ Osoro*

<sup>1</sup> Bere a AWURADE pεε se ɔnam ahum so fa Elia kɔ soro no, na Elia ne Elisa nam Gilgal kwan so.

<sup>2</sup> Na Elia ka kyerεε Elisa se, “Tena ha na AWURADE aka akyere me se, menkɔ Bet-El.” Na Elisa buae se, “Mmere dodow a AWURADE te ase, na wo nso wote ase no, merennyaw wo da.” Enti wɔnantew kɔɔ Bet-El.

<sup>3</sup> Adiyifo kuw a wofi Bet-El no baa Elisa nkyεn bebisaa no se, “Na wunim se AWURADE rebεfa wo wura afi wo nkyεn nne?”

Elisa buae se, “Yiw, minim saa. Enti monyε komm.”

<sup>4</sup> Na Elia ka kyerεε Elisa se, “Tena ha, na AWURADE aka akyere me se, menkɔ Yeriko.”

Nanso Elisa buaa bio se, “Mmere dodow a AWURADE te ase, na wo nso wote ase yi, merennyaw wo da.” Enti wɔnantew kɔɔ Yeriko.

<sup>5</sup> Na adiyifo kuw a wofi Yeriko baa Elisa nkyen  
bebisa no se, “Na wunim se AWURADE rebεfa wo  
wura afi wo nkyen nnε ana?”

Obuaa bio se, “Yiw, minim. Enti monyε  
komm.”

<sup>6</sup> Na Elia ka kyereε Elisa se, “Tena ha, na  
AWURADE aka akyere me sε, menkɔ Asubɔnten  
Yordan ho.”

Nanso, Elisa buaa bio se, “Mmere dodow  
a AWURADE te ase, na wo nso wote ase yi,  
merennyaw wo.” Enti wɔtoaa so kœ.

<sup>7</sup> Mmarima aduonum fi adiyifo kuw no mu nso  
kɔ kogyinaa akyirikyiri baabi, de wɔn ani kyereε  
faako a na Elia ne Elisa gyina wɔ Asubɔnten  
Yordan ho hɔ no. <sup>8</sup> Na Elia bobɔw n’atade, de  
bɔɔ nsu no ani. Nsu no mu kyεε abien, ma wɔfaa  
asase kesee so twae.

<sup>9</sup> Wotwa wiei no, Elia bisaa Elisa se, “Den na  
menyε mma wo ansa na wɔahwim me akɔ?”

Na Elisa buae se, “Mesrε wo, ma minnya wo  
honhom tumi no mmɔho.”

<sup>10</sup> Elia kae se, “Woabisa ade a ne ye ye den. Na  
sε wuhu se wɔrefa me afi wo nkyen a, wo nsa  
beka w’abisade no. Na sε amma saa de a, wo  
nsa renka.”

<sup>11</sup> Wɔnam na wɔredi nkɔmmɔ no, preko pε,  
ogya teaseεnam bae a ogya aponkɔ retwe. Efaa  
wɔn ntam ma wɔn ntam tetewee, na ahum bi  
faa Elia de no kɔɔ ɔsoro. <sup>12</sup> Elisa huruw, teeε  
mu se, “M’agya! M’agya! Israel nteaseεnam ne  
nteaseεnamkafo!” Na Elisa anhu no bio, Elisa  
suanee n’atade mu abien.

<sup>13</sup> Na Elisa faa Elia atade nguguso a efii ne ho  
gui no, na ɔsan kɔɔ Asubɔnten Yordan konkɔn

no so. <sup>14</sup> Ὅde atade nguguso no bɔɔ asu no ani teεε mu se, "AWURADE, Elia Nyankopɔn wɔ he?" Ehɔ ara asu no mu paee abien maa Elisa faa mu.

<sup>15</sup> Bere a adiyifo kuw a wɔwɔ Yeriko huu asem a asi no, wɔteεε mu se, "Elisa abedi Elia ade!" Na wokohyiaa no, kotow no. <sup>16</sup> Wɔkae se, "Owura, ka biribi, na yεn mu ahooedenfo aduonum bekyinkyin sare no so, ahwehwε wo wura. Ebia na AWURADE honhom agyaa no asi bepɔw bi so anaa obon bi mu."

Elisa kae se, "Dabi, monnsoma wɔn." <sup>17</sup> Nanso wɔkɔɔ so haw no ara, kosii se, onhu nea ɔnyε ne ho, nti akyiri no ɔkaa se, "Eye, monsoma wɔn." Enti, mmarima aduonum, de nnansa kyinkyin, hwehwε, nanso wɔanhу Elia. <sup>18</sup> Bere a wɔsan wɔn akyi no, na Elisa da so wɔ Yeriko. Obisaa wɔn se, "Manka ankyere mo se monnko?"

### *Elisa Nsɛnkyerenne A Edi Kan*

<sup>19</sup> Afei, Yeriko mpanyimfo kɔsraa Elisa. Wɔka kyereε no se, "Ódεεfo, yεwɔ dadwen bi. Saa kurow yi dabea ne nneεma a atwa ho ahyia yε fε, senea wuhu no. Nanso nsu no nye, na asase no nso mma nnɔbae."

<sup>20</sup> Elisa kae se, "momma me nsukorade foforo a wɔde nkyene agu mu." Na wɔde bae.

<sup>21</sup> Afei, ɔkɔɔ asu no a kurom hɔfɔ no saw nom no mu, kɔtow nkyene no guu mu. Na ɔkae se, "Sεε na AWURADE se: Mayε asu yi yiye. Eremma owu, na asase no bεma ne nnɔbae." <sup>22</sup> Na ampa ara, efi saa bere no, asu no aye asu pa senea Elisa kae no.

<sup>23</sup> Elisa fii Yeriko kɔɔ Bet-El. Ὄrekɔ no, mmari-maa bi a wofi kurow no mu dii ne ho fεw, serew

no se, “Tipae, foro kɔ ε! Tipae, foro kɔ ε!” <sup>24</sup> Elisa dan ne ho hwεε wɔn na ɔde AWURADE din domee wɔn. Na sisi abien pue fii wuram, bekunkum wɔn mu aduanan abien. <sup>25</sup> Elisa fii hɔ no, ɔkɔc bepɔw Karmel so, na ofi hɔ kɔɔ Samaria.\*

## 3

### *Moab Ne Israel ɔko*

<sup>1</sup> Ahab babarima Yoram na odii hene wɔ Israel bere a na Yudahene Yehosafat adi ade mfe dunwɔtwe wɔ Yuda no. Odii ade wɔ Samaria mfe dumien. <sup>2</sup> ɔyεε AWURADE ani so bɔne. Nanso na n'amumɔye no nte sε n'agya ne ne na de no. ɔsεee Baal adum kronkron a n'agya sii no. <sup>3</sup> Nanso ɔtoaa ahonisom so, sεnea Nebat babarima Yeroboam dii Israelfo anim ma wɔyεe no.

<sup>4</sup> Na Moabhene Mesa ne ne nkurofo yεn nguan. Na wotua sonkahiri a εyε nguamma mpem ɔha ne adwennini mpem ɔha ho nwi ma Israelhene afe biara. <sup>5</sup> Nanso Ahab wu akyi no, Moabhene sore tiaa Israelhene. <sup>6</sup> Enti ɔhene Yoram fii Samaria boaboa Israel asraafo ano. <sup>7</sup> ɔde nkra kɔmaa Yudahene Yehosafat se, “Moabhene asɔre atia me. Wobεboa me na me ne no ako ana?”

Na Yehosafat buae se, “Me ne wo bεkɔ. Wo ne me yε anuanom, me nkurofo yε wo nkurofo, m'apɔnkɔ yε w'apɔnkɔ.”

<sup>8</sup> Na Yehosafat bisae se, “ɔkwan bεn na yεbεfa so akɔ?”

---

\* <sup>2:25</sup> Elisa tenaa Samaria.

Yoram buae se, “Yεbεtοa wɔn afi Edom\* sare so.”

<sup>9</sup> Edomhene<sup>†</sup> ne n'akofo kɔkaa wɔn ho. Na asraafo dɔm abiesa no bɔɔ nsra twaa wɔn ho besii wɔn anan mu saa nnanson no, na wɔnne wɔn mmoa nnya nsu nnom.

<sup>10</sup> Israelhene tεεε mu bisae se, “Yεnyε yεn ho dεn? AwURADE de yεn baasa aba ha sε Moabhene nni yεn so ana?”

<sup>11</sup> Nanso Yudahene Yehosafat bisae se, “Enti AwURADE diyifo biara nka yεn ho wɔ ha ana? Sε wɔn mu bi wɔ ha a, yebetumi abisa AwURADE nea yεnyε.”

ɔhene Yoram mpanyimfo no mu baako kae se, “Safat babarima Elisa wɔ ha. Na ɔyε Elia boafο.”

<sup>12</sup> Enti Yehosafat kae se, “Eno de, AwURADE betumi akasa afa no so.” Na Israelhene, Yudahene ne Edomhene kɔɔ Elisa nkyεn abisa.

<sup>13</sup> Elisa ka kyεrεs Israelhene se, “Wo ho nhia me. Kɔ w'agya ne wo na adiyifo abosonsomfo no nkyεn.” Nanso ɔhene Yoram kae se, “Dabi! Efisε εyε AwURADE na ɔfrεε yεn ahemfo baasa yi baa ha sε orebeyi yεn ahyε Moabhene nsa!”

<sup>14</sup> Na Elisa buae se, “Mmere dodow a AWURADE Tumfo a mesom no no te ase yi, sε εyε Yudahene Yehosafat a mibu no a, anka merenhaw me ho wɔ wo ho. <sup>15</sup> Afei, ma obi a obetumi abɔ sanku mmra.”

Bere a wɔrebɔ sanku no, AwURADE tumi baa Elisa so, <sup>16</sup> ma ɔkae se, “Sεnea AWURADE se ni:

\* <sup>3:8</sup> Eyi kyεrε sε na εεε sε wofi atɔe fam twa fa Nkyene Po na wotumi kotua Moab fi anafo fam. Eno nti na εεε sε wɔfa Edom mantam a na Yuda di so no mu. † <sup>3:9</sup> Nokware, na Edomhene yε amrado a Yehosafat na oyii no (8.20; 1 Ah 22.48).

Saa obon a emu nsu ayow yi, wɔde nsu bɛhyɛ no ma. <sup>17</sup> Worenhu mframa anaa osu senea AWURADE ka no, nanso saa obon yi, wɔbɛhyɛ no nsu ma. Mubenya bi ama mo ho, mo anantwi ne mo mmoa a aka no. <sup>18</sup> Na eyi ye ade a εγε mmerew ma AWURADE. Ḍbɛma moadi Moab asraafo so nkonom. <sup>19</sup> Mubedi wɔn nkuropɔn papa so nkonom, mpo, nkuropɔn a wɔabɔ ho ban no. Mubetwitwa wɔn nnua nyinaa agu. Mubesisiw wɔn asu aniwa, na mode abo asee wɔn nsase pa.”

<sup>20</sup> Na ade kyee a eduu bere a wɔbɔ anɔpa afore no, nsu puee preko pe. Na esen fii Edom, na ankyɛ biara na nsu abu so wɔ baabiara.

<sup>21</sup> Bere a Moabfo tee se asraafo dɔm abiesa reba wɔn so no, wɔn nso boaboa mimarima a wobetumi ako, mmofra ne mpanyin ano, de wɔn sisii wɔn ahye so. <sup>22</sup> Na ade kyee a wɔsɔree no, na owia no abɔ wɔ asu no so, ama ani abere se mogya. <sup>23</sup> Moabfo no tees mu se, “Ἐγε mogya. Sesee asraafo dɔm abiesa no atwa wɔn ho ako, akunkum wɔn ho wɔn ho! Momma yenkɔfow asade no!”

<sup>24</sup> Bere a woduu Israelfo nsraban mu no, Israel asraafo gyee bum, kɔtoaa Moabfo, ma woguanee. Israel asraafo no taa wɔn koduu Moab asase so. Wɔretaa Moabfo no nyinaa no, na wɔresee wɔn nneemaa. <sup>25</sup> Wɔssee wɔn nkurow akɛse, de abo kataa wɔn nsase pa so, sisiw asuti nyinaa, twitwaa nnua pa nyinaa. Kir-Haraset nko ara na ekae, na ενο mpo, wɔtow hyɛs so.

<sup>26</sup> Bere a Moabhene huu se ɔredi nkogu no, odii n'akofo ahanson anim, yeree wɔn ho, pees se wɔpem fa atamfo no nsraban a εβεν Edomhene

no mu, nanso wɔantumi. <sup>27</sup> Enti ɔfaa ne babarima panyin a anka εεε se odi n'ade se ohene no, de no bɔɔ ɔhyew afɔre wɔ afasu no ho. Abufuw kese baa Israel so, na wɔsan wɔn akyi kɔɔ wɔn ankasa asase so.

## 4

### *Elisa Boa Ḍbea Kunaf No*

<sup>1</sup> Da bi, Elisa mfɛfo adiyifo no mu baako kunafno baa ne nkyɛn, besu kyereεε no se, “Me kunu a na ɔsom wo no awu. Na wunim senea na osuro AWURADE. Nanso mprempren obi a mede no ka aba rehunahuna se, ɔbɛfa me mmabarima baanu se nkoo.”

<sup>2</sup> Elisa bisaa no se, “Dɛn na metumi ayε de aboa wo? Kyere me nneεma a wowɔ wɔ fie.” Obuae se, “Minni hwhee se ngo ahina baako.”

<sup>3</sup> Elisa ka kyereεε no se “Kɔfɛm nhina dodow biara a wubunya afi wo nnamfonom ne wo mfɛfo nkyɛn. <sup>4</sup> Afei, fa wo mmabarima no kɔ wo fi, na to pon mu. Hwie ngo no fi w'ahina no mu, gugu nhina no mu. Nea εbεyε ma biara, yi si nkyɛn.”

<sup>5</sup> Enti ɔyεε saa. Ne mmabarima no de nhina bebree bresε no, ma ɔhyehyεε no amaama.

<sup>6</sup> Ankyε na emu biara yεε ma tenn. ɔka kyereεε ne mmabarima no mu baako se, “Bre me ahina fofo.”

ɔka kyereεε no se, “Ebi nni hɔ bio.” Na afei ngo no a ɔrehwiegno no sae.

<sup>7</sup> Bere a ɔkaa asem a asi no kyereεε Onyankopon nipa no, ɔka kyereεε no se, “Afei, tɔn ngo no, na fa tua w'aka, na sika no bi bɛka ama wode ahwε wo ho ne wo mmabarima no.”

### *Elisa Ne ḥbea A Ofi Sunem No*

<sup>8</sup> Da koro bi, Elisa kɔɔ Sunem kurow mu. Na ḥbea ɔdefo bi te kurow no mu. ḥtoo nsa free Elisa se ommedidi. Efi saa bere no, bere biara a obetwa mu wɔ hɔ no, ɔfa hɔ kodidi. <sup>9</sup> ḥka kyereε ne kunu se, “Migye di se saa ḥbarima yi a ɔtaa ba ha yi ye Onyankopɔn nipa kronkron. <sup>10</sup> Ma yensiesie ɔdan bi mma no wɔ soro hɔ na yemfa mpa, ɔpon, akongua ne kanea nsi mu mma no. Na bere biara a ḥbeba ha no, wanya baabi asoε.”

<sup>11</sup> Da bi, Elisa san baa Sunem. ḥkɔɔ ne soro dan no mu kɔsoε. <sup>12</sup> ḥka kyereε ne somfo Gehasi se, “Ka kyere ε ḥbea no se, mepε se meka asem bi kyere ε no.” ḥbea no bae no, <sup>13</sup> Elisa ka kyereε Gehasi se, “Ka kyere ε no se, yen ani aso ne som pa a wasom yen no. Na bisa no nea yen so yebetumi aye ama no. ḥpe se midi ne ho adanse kyere ε ḥhene anaa asraafo sahene no?”

Obuae se, “Dabi, efise m'abusuafo hwε me yiye.”

<sup>14</sup> Akyiri no, Elisa bisaa Gehasi se, “Den na wugye di se yebetumi aye ama no?”

ᬁtow maa no se, “Onni babarima na ne kunu nso abɔ akwakoraa.”

<sup>15</sup> Elisa ka kyereε no se, “Frε no bra bio.” ḥbea no bae no, Elisa ka kyereε no wɔ ɔpon no ano se, <sup>16</sup> “Afe sesεε saa bere yi ara mu, na ḥbabarima da wo sre so.”

ᬁteεε mu se, “Dabi, me wura, mesrε wo, ntwa me nkontompo saa. Onyankopɔn nipa.”

<sup>17</sup> Na ampa ara, bere tiaa bi akyi no, ḥbea no nyinsenee. Na afe saa bere no ara, ɔwoo ḥbabarima senea Elisa kae no pεrεεpε.

**18** Ne ba no nyin no, da bi, ɔkɔsraa n'agya a na ɔne n'apaafø reye adwuma. **19** Preko pe, ɔkae se, "Me ti pae me! Me ti pae me!"

N'agya ka kyereεε n'apaafø no mu baako se, "Fa no kɔ fie kɔma ne na."

**20** ɔpaani no de no kɔc fie. Ne na gyee no too ne sre so. Nanso, eduu owigyinae mu no, owui. **21** ɔpagyaw no de no kɔtoo Onyankopɔn nipa no mpa so. ɔttoo pon no mu gyaw no hɔ kɔe.

**22** ɔsomaα ɔbofo kɔbɔc ne kunu amanneε se, "Soma apaafo no baako na ɔmfa afurum mmra, senea metumi akodu Onyankopɔn nipa no hɔ ntɛm, asan aba."

**23** Obisae se, "Adɛn nti na wope se wokɔ nne yi ara? Enye ɔsram Foforo Afahye, na enye homeda nso."

Nanso ɔkae se, "ɛwɔ mu saa."

**24** Enti ohyehyεε afurum no, ka kyereεε ɔpaani no se, "Ka wo ho. Enye me nti na wobetɔ wo bo ase, na mmom, kɔ ara, gye se maka se tɔ wo bo ase." **25** ɔrebedu Onyankopɔn nipa no nkyen wɔ bɛpɔw Karmel so no, Elisa huu no wɔ akyirikyiri.

ɔka kyereεε Gehasi se, "Hwɛ, ɔbea a ofi Sunem no reba. **26** Tu mmirika kohyia no, na bisa no se, 'Wo ne wo kunu ne wo ba ho ye ana?' "

ɔbea no buae Gehasi se, "Yɛn nyinaa ho ye."

**27** Nanso ɔbaa Onyankopɔn nipa no nkyen wɔ bɛpɔw no so no, ɔhwhee ne nan ase, soo n'anammɔn mu. Gehasi sum no, nanso Onyankopɔn nipa no kaa se, "Gyaa no. Biribi reteetee no, na AWURADE nso nkyerεε me dekode no."

<sup>28</sup> Na ɔbea no kae se, “Wo ara me wura, wo na wokae se, menya ɔbabarima. Na manka ankyere wo se mma memfa m’ani nto so?”

<sup>29</sup> Na Elisa ka kyereε Gehasi se, “Boa wo ho, na mensoma wo, fa me pema no, na kɔ. Nkasa obiara ho wo okwan so. Kɔ na fa pema no kɔto abofra no anim.”

<sup>30</sup> Na abarimaa no na kae se, “Mmere dodow a AWURADE te ase, na wo nso wote ase yi, merenkɔ fie gye se woka me ho.” Enti Elisa san ne no kɔe.

<sup>31</sup> Gehasi yee ntɛm dii kan, de pema no kɔtoo abofra no anim, nanso biribiara ansi. Nkwa ho nsenkyerɛnne biara amma. ɔsan n’akyi kohyiaa Elisa, bɔɔ no amanneε se, “Abofra no nnyanee ε.”

<sup>32</sup> Bere a Elisa duu hɔ no, ampa na abofra no awu da odiyifo no mpa so. <sup>33</sup> ɔno nkɔ kɔɔ hɔ, too ne ho pon mu, bɔɔ AWURADE mpae. <sup>34</sup> Afei, obutuw abofra no so, de n’ano tuaa abofra no ano, de n’ani fam abofra no ani, de ne nsa susoo abofra no nsa. Afei, abofra no ho fitii ase yee hyew bio. <sup>35</sup> Elisa sore, dii akɔneaba wɔ ɔdan no mu kakra. Afei, ɔdaa abofra no so bio. Saa bere no, abofra no nwansii mpɛn ason, na ɔtew n’ani.

<sup>36</sup> Afei, Elisa somaa Gehasi se, “Frɛ abofra no na bra.” Ne na no bae no, Elisa ka kyereε no se, “Wo ba no ni, fa no kɔ.” <sup>37</sup> Ofi ahodwiriw mu hwee ne nan ase daa no ase. Afei, ɔfaa ne ba no, de no sian kɔɔ fam.

### *ɔkɔm Kese Bi Mu Nsenkyerɛnne*

<sup>38</sup> Elisa san kɔɔ Gilgal, nanso na ɔkɔm asi asase no so. Da bi a adiyifokuw tete n’anim no, ɔka

kyereεε ne somfo se, “Fa ɔsεn kεse si gya so, na yε abɔmu ma saa mmarima yi.”

<sup>39</sup> Wɔn mu baako kɔɔ wuram sε ɔrekɔρε atosode, na onyaa εfere kotoku ma de bae. Otwitwa de guu ɔsεn no mu a na onnim sε awuduru wɔ mu. <sup>40</sup> Na wodii kakraa bi pε, wɔteεtεε mu se, “Onyankopɔn nipa, awuduru wɔ abɔmu no mu!” Eno nti, wɔanni bio.

<sup>41</sup> Elisa kae se, “Mommre me asikresiam kakra.” ɔde guu ɔsεn no mu, kae se, “Afei, ayε yiye nti munkodi.” Na anhaw wɔn bio.

<sup>42</sup> Da bi, ɔbarima bi a ɔyε Baal-Salisani bree Onyankopɔn nipa no atoko foforo kotoku ma, ne brodo mua aduonu. Elisa kae se, “Fa ma adiyifokuw no, na wonni.”

<sup>43</sup> ɔsomfo no tεεε mu se, “Wuse dεn? Kakra yi na yεmfa mma nnipa ɔha yi ana?”

Nanso Elisa tii mu se, “Fa ma adiyifokuw no na wonni, na AWURADE ka se, ‘Obiara bedi amee, na bi mpo bεka akyi.’” <sup>44</sup> Na ampa ara, obiara didi mee ma bi mpo kae, sεnea AWURADE hyεε ho bɔ no.

## 5

### *Naaman Ayaresa*

<sup>1</sup> Na Aramhene\* bu Naaman a ɔyε asraafo so sahene no yiye. Efise εnam ne so na AWURADE maa Aram dii nkonom akεse bebree. Ewɔ mu sε na Naaman yε ɔkofo kεse de, nanso na ɔyare kwata.

<sup>2</sup> Afei, na Aram akofo adi Israel asase so, na abaawa ketewa bi ka wɔn a wɔkyeree wɔn

---

\* <sup>5:1</sup> Na ɔhene no din de Ben-Hadad II.

nnommum no ho. Wode saa abaawa no maa Naaman yere se n'abaawa. <sup>3</sup> Da bi, abaawa no ka kyereεε n'awuraa se, "Se me wura kohu odiyifo a ɔwɔ Samaria no a, anka ɔbesa no yare ama kwata no afi ne honam ani."

<sup>4</sup> Enti Naaman kaa asem a abaawa a ofi Israel no ka kyereεε no no kyereεε ɔhene. <sup>5</sup> ɔhene<sup>†</sup> no ka kyereεε no se, "Kɔ, na kɔsra odiyifo no. Mɛkyerew krataa aka wo ho, na wode akɔma Israelhene." Enti Naaman faa dwetε akyeðe kilogram ahaasa aduanan (340), sikakɔkɔ kilogram aduosia nkron ne ntade mmɔho du, na osii mu koe. <sup>6</sup> Krataa a ɔde rekɔma Israelhene no mu asem ne se, "Menam krataa yi so reda me somfo Naaman adi akyere wo. Mεpε se wosa no yare ma ne kwata no fi ne honam ani."

<sup>7</sup> Bere a Israelhene kenkan krataa no, ɔde ahometew sunsuan n'atade mu, kae se, "Saa ɔbarima yi asoma ɔkwatani aba me nkyen, se mensa no yare! Meyε Onyankopɔn a mitumi kum, san ma nkwa? ɔrehwehwε kwan bi afa so, anya nnyinaso bi na wabetow ahyε yen so bio."

<sup>8</sup> Bere a Elisa, Onyankopɔn nipa, tee se ɔhene no asunsuan ne ntade mu no, ɔde nkra kɔmaa no se, "Aden nti na woasunsuan wo ntade mu? Soma Naaman na ɔmmra me nkyen na obehu se odiyifo papa bi wɔ Israel." <sup>9</sup> Enti Naaman faa n'apɔnkɔ ne ne nteaseεnam, kɔtwen wɔ Elisa fi pon ano. <sup>10</sup> Na Elisa somaa ɔbofɔ kɔka kyereεε no se, "Kɔhohoro wo ho mpɛn ason wɔ Asubɔnten Yordan mu, na wo honam bεba mu, ama wo kwata no akɔ."

---

<sup>†</sup> 5:5 ɔhene a na wɔreka ne ho asem yi, wɔfrε no Yoram.

**11** Na Naaman bo fuwii, ma osii kwan so. Ḍkae se, “Na minim sε, nea εbεyε biara no, ḡbεba abehyia me! Na minim sε ebia, ḡde ne nsa bεfa kwata no so, na wabɔ AWURADE a, εyε ne Nyankopɔn no din, nam so asa me yare. **12** Nsubɔnten Abana ne Parpar a εwɔ Damasko nsen nsubɔnten a εwɔ Israel nyinaa? Aden nti na menkɔhohoro me ho wɔ mu, na minnya ayaresa?” Enti Naaman dan ne ho de abufuw sii mu.

**13** Nanso ne mpanyimfo bɔɔ mmɔden kasa kyereε no se, “Owura, sε odiyifo no kaa se ye adwuma kεse bi a, anka worenε ana? Eno nti, tie asem a waka sε kɔhohoro wo ho kεke, na wo ho betɔ wo no, na di so.” **14** Enti Naaman kɔɔ Asubɔnten Yordan mu, kɔdɔɔ asukɔ mpren ason, senea Onyankopɔn nipa no hyεε no sε ɔnyε no. Ne honam ani daa hɔ te sε akokoaa, maa ne kwata no nyinaa kɔe.

**15** Naaman ne ne dɔm no san kɔ kɔhwehwεε Onyankopɔn nipa no akyi kwan. Wokogyinaa n'anim, maa Naaman kae se, “Afei na mahu sε Onyankopɔn nni wiase ha baabiara sε Israel nkɔ ara. Afei, mesrε wo sε, gye m'akyεde yi.”

**16** Nanso Elisa buae se, “Mmere dodow a Onyankopɔn a mesom no te ase yi, merennye akyεde biara.” Ewɔ mu sε Naaman hyεε no biara sε onnye akyεde no, nanso Elisa annye.

**17** Afei, Naaman kae se, “Eye, εno de, ma me kwan na memfa ha dɔte atifi abien nsoa me furumpɔnkɔ abien, na memfa nka me ho nkɔ me kurom. Efi nne, Onyankopɔn akyi no, meremmɔ ɔhyew afore anaa afore biara mma onyame bi bio. **18** Na mesrε sε, AWURADE mfa saa bɔne

yi nkyε me. Sε me wura ɔhene rekɔ Rimon abosomfi akɔsom, na misuso ne mu a, me nso mɛkotow nti, AWURADE mfa eyi nkyε me.”

<sup>19</sup> Elisa kae se, “Kɔ asomdwoe mu.” Enti Naaman san sii kwan so.

### *Gehasi Anibere*

<sup>20</sup> Nanso Elisa somfo Gehasi kaa wɔ ne tirim se, “Anka εnse sε me wura ma Aramni yi kɔ a wannye akyεde yi. Mmere dodow a AWURADE te ase yi, metiw no, na makogye biribi afi ne nkyεn.”

<sup>21</sup> Enti Gehasi tiw no. Bere a Naaman huu no sε ɔde mmirika reba ne so no, osi fii ne teaseεnam mu kohyiaa no. Naaman bisaa no se, “Wobaa no asomdwoe mu ana?”

<sup>22</sup> Gehasi buae se, “Yiw, nanso me wura asoma me sε memmekɛ ka nkyerε wo se, mmabun baanu bi a wɔyε adiyifo a wofi Efraim kurow a εda bepɔw so no mu abedu mprempren ara. Ose ɔrehwehwε dwete kilogram aduasa anan ne ntade nsakramu abien de ama wɔn.”

<sup>23</sup> Naaman kae se, “Enyε asem a εyε den, gye dwete kilogram aduasa anan yi.” ɔmaa no ntade nsakramu abien, kyekyeree sika no wɔ nkotoku abien mu, yii asomfo baanu soaa akyεde no, maa Gehasi. <sup>24</sup> Nanso woduu bepɔw no so no, Gehasi gyee akyεde no fii asomfo no nkyεn, ma wɔsan wɔn akyi kɔe. Afei, ɔde akyεde no kosiee ofi no mu.

<sup>25</sup> Bere a ɔkɔɔ ne wura Elisa nkyεn no, obisaa no se, “Gehasi, wokɔɔ he?”

Obuae se, “Menkɔɔ baabiara.”

<sup>26</sup> Nanso Elisa bisaa no se, “Woanhу sε bere a Naaman si fii ne teaseεnam mu behyiaa wo no,

na mewɔ hɔ honhom mu? Saa bere yi na εεε sε wugye sika ne ntade ne ngodua mfuw ne bobε mfuw ne nguan ne anantwi ne asomfo? <sup>27</sup> Nea woayε yi nti, wo ne wo mma ne wo mma mma bεyare Naaman kwata no bi afebɔɔ.” Bere a Gehasi fii dan no mu no, na kwata aye no a ne ho ahoa aye sε sukyerɛmma.

## 6

### *Abonnuati A Etεn Nsu Ani*

<sup>1</sup> Da bi, adiyifo kuw baa Elisa nkyen bεka kyereε se, “Sεnea wo ara wuhu no, baabi a yene wo hyia ha yi sua. <sup>2</sup> Ma yεnkɔ Asubɔnten Yordan ho a nnua bebree wɔ hɔ. Ehɔ de, yebetumi asi ɔdan foforo, ahyia mu wɔ hɔ.”

ɔka kyereε wɔn se, “Eye, monkɔyε.”

<sup>3</sup> Obi kaa n’adwene se, “Mesre wo, bεka yεn ho na yεnkɔ.”

ɔkae se, “Mate yεbεkɔ.”

<sup>4</sup> Bere a woduu Yordan ho no, wofii ase buu nnua. <sup>5</sup> Nanso wɔn mu baako rebu dua no, n’abonnua hɔn tɔɔ asu no mu. ɔteεε mu se, “O me wura! εye abonnua a mekoɔrεε!”

<sup>6</sup> Onyankopɔn nipa no bisae se, “Ehefa na εtɔε?” ɔkyereε Elisa baabi ko no, Elisa twaa pema, na ɔtow kyenee asu no mu. Ehɔ ara abonnua ti no pagyaw ne ho, bεtεn asu no ani. <sup>7</sup> Elisa ka kyereε no se, “Ma so yi.” Na ɔbarima no teεε ne nsa yii.

### *Elisa Nsa Ka Aramfo No*

<sup>8</sup> Bere a Aramhene ne Israel redi ako no, ḡne ne mpanyimfo tuu agyina, kae se, “Yεbεboaboa yεn asraafo ano wɔ ha anaa εha.”

<sup>9</sup> Ntεm pa ara, Onyankopɔn nipa Elisa bɔɔ Israelhene\* kɔkɔ se, “Ntwiw mmεn beae hɔ, efisε Aramfo no reyε nhyehyεe, aboaboa wɔn asraafo ano wɔ hɔ.” <sup>10</sup> Enti Israelhene hwεε beae a Onyame nipa no kyereε no no. Elisa kɔc so bɔɔ ḡhene no kɔkɔ mpren pii, na εmaa n'ani daa fam wɔ mmeae a εtete saa no ho.

<sup>11</sup> Aramhene were how wɔ asεm yi ho. ḡfreeε ne mpanyimfo bisaa wɔn se, “Mo mu hena na ɔyε ɔfatwafo no? Hena na ɔka me nhyehyεe a mayε kyere Israelhene?”

<sup>12</sup> Mpanyimfo no mu baako buae se, “Me wura, εnyε yεn. Elisa a ɔyε odiyifo wɔ Israel no na ɔka wo kokoamsem kyere Israelhene.”

<sup>13</sup> ḡhene no hyεe se, “Monkɔhwehwε baabi a Elisa wɔ, na yεbesoma asraafo ama wɔakɔkyere no.” Na nkra bae se, “Elisa wɔ Dotan.” <sup>14</sup> Enti anadwo bi, Aramhene somaa asraafo bebree ne wɔn nteaseεnam ne wɔn aponkɔ kotwaa dantaban faa kuropɔn no ho. <sup>15</sup> Bere a Onyankopɔn nipa no somfo soree ahemadakyε, sii afikyiri no, na asraafo, aponkɔ ne nteaseεnam atwa hɔ ahyia. ḡteεs mu kyereε Elisa se, “O, me wura! Den na yεnyε?”

<sup>16</sup> Elisa ka kyereε no se, “Nsuro na yεwɔ dɔm sen wɔn.”

<sup>17</sup> Afei, Elisa bɔɔ mpae se, “AWURADE, bue n'ani na ma onhu ade,” AWURADE buee ne somfo ani, na ɔmaa n'ani so no, ohuu se Elisa nkyεn mu a

---

\* **6:9** Israelhene no din de Yoram.

εkyerε berow no, ogya aponko ne nteaseenam na aye ho ma.

<sup>18</sup> Bere a Aramfo asraafo bo puua wɔn no, Elisa bɔɔ mpaε se, "AWURADE, mesre wo, ma wɔn ani mfurafura." Na AWURADE yee nea Elisa bisae no.

<sup>19</sup> Na Elisa fii adi, kɔka kyereε wɔn se, "Moafa ɔkwan bɔne so aba. Enye kurow a morehwehwε no ni. Munni m'akyi, na mede mo bεkɔ onipa a morehwehwε no no nkyen." Na odii wɔn anim koduu Samaria.

<sup>20</sup> Na woduu Samaria pe, Elisa bɔɔ mpaε se, "AWURADE, afei bue wɔn ani, na ma wonhu ade." Na AWURADE yee, na wohuu se wɔwɔ Samaria.

<sup>21</sup> Bere a Israelhene huu wɔn no, ɔtεεs mu, bisaa Elisa se, "M'agya, minkunkum wɔn ana?"

<sup>22</sup> Elisa buaa no se, "Nkunkum wɔn. So wubekunkum wɔn a wode w'ankasa afoa ne agyan afa wɔn nnommum no ana? Ma wɔn aduan ne nsu, na wonnidi, nnom na ma wɔnsan nkɔ wɔn wura nkyen." <sup>23</sup> Enti ɔhene no too wɔn pon kese, na wodidi, nom wiee no ɔma wɔsan kɔc wɔn hene nkyen. Enti Aramfo afowfo no twee wɔn ho fii Israel asase ho koraa.

### *Ben-Hadad Tua Samaria Ano*

<sup>24</sup> Akyiri no, Aramhene Ben-Hadad boaboa a n'akofo nyinaa ano, de wɔn kotua Samaria ano. <sup>25</sup> Ebbaa saa no, ɔkɔm kese baa kurow no mu. Eyee kakra no, na wɔtɔn afurum ti nsania ani dwete kilogram baako, na aborɔnoma bin kuruwa ma, na ne bo ye nsania ani dwete gram aduonum awotwe.

**26** Da bi a Israelhene nam kurow no fasu ho no, ɔbea bi kɔɔ ne nkyɛn kɔsreɛ no se, “Me wura ɔhene, mesre wo, boa me.”

**27** Obuaa no se, “Sε AWURADE ammoa wo a, dεn na metumi aye? Minni aduan anaa nsa a mede bema wo.” **28** ɔhene no bisaa no se, “Dεn asem?”

Obuae se, “Saa ɔbea yi kae se, yεnwe me babarima da bi, na ade kye a, yεawe ɔno nso de. **29** Enti yεnoaa me babarima wee. Afei, ade kyee no, meka kyereɛ no se, ‘Kum wo babarima no ma yεnwe,’ nanso na ɔde no akosie.”

**30** Na ɔhene no tee saa asem no, osunsuan ne ntade mu. Na ɔhene no nenam ɔfasu no ho no, nnipa no huu se ɔhyε atweaatam wɔ n'ase.

**31** ɔhene no kaa ntam se, “Sε nne mankum Safat babarima Elisa a, Onyankopɔn nkum me.”

**32** Elisa te ne fi a ɔne Israel mpanyimfo reyε nhiyiamu na ɔhene somaa abɔfo kɔfreɛ no. Nanso ansa na abɔfo no rebedu no, Elisa ka kyereɛ mpanyimfo no se, “Owudifo asoma ɔbarima bi se ommekum me. Se odu ha a, to pon no mu, na ɔnka akyi. Na εrenkyε ne wura no bedi n'akyi aba.” **33** Elisa gu so rekasa no, ɔbɔfo no bae.

Na ɔhene no kae se, “Σye AWURADE na ɔde saa ɔhaw yi abre yεn! Adεn nti na εse se mekɔ so twen AWURADE?”

## 7

**1** Elisa buae se, “Tie saa asem yi fi AWURADE nkyɛn! Sεnea AWURADE se ni: Ebedu ɔkyena sesεε, wɔbεtɔn asikresiam a wɔayam no muhmuhu lita asia agye dwetε gram dubaako wɔ

Samaria egua biara so. Na atoko nso, wɔbɛtɔn lita du agye dwetɛ gram du abien pɛ.”

<sup>2</sup> ɔpanyin a ɔboa ɔhene no ka kyereɛ Onyankopɔn nipa no se, “Sε AWURADE bue ɔsoro mfɛnsere mpo a, εremma saa da!”

Na Elisa kae se, “Wubehu sε εbεba mu saa, nanso worentumi nni emu biara bi.”

### *Akwatafo Ba Atamfo Nsraban Mu*

<sup>3</sup> Afei, mmarima akwatafo\* baanan bi betenatena kurow no apon ano. Wobisabisa wɔn ho wɔn ho se, “Adɛn nti na εsε sε yetena ha twɛn ara kosi sε yebewuwu? <sup>4</sup> Sε yetena ha a, ɔkɔm bɛde yɛn dodo; saa ara na sε yesan kɔ kurow no mu nso a, ɔkɔm bɛwe yɛn ara ne no. Enti ebeye sε yεbɛkɔ, na yɛde yɛn ho bɛma Aramfo asraafo no. Na sε wɔma yetena ase a, na ne yiye mu ne no. Na sε wokunkum yɛn nso a, na εno ara ne no.”

<sup>5</sup> Enti saa anwummere no, wosii mu kɔɔ Aramfo nsraban no mu, nanso na obiara nni hɔ. <sup>6</sup> Na AWURADE ama asraafo no nyinaa ate nteaseɛnam a εreko mmirikaden no ne aponkɔ no ne asraafo dɔm kese a wɔrebɛn wɔn no nnyigyei. Wɔteɛɛɛ mu se, “Israelhene afa Hetifo ne Misraimfo sε wɔmmɛtow nhye yɛn so.” <sup>7</sup> Enti wɔbɔɔ huboa, na woguan anadwo no, gyaw wɔn ntamadan, aponkɔ, mfurum ne wɔn biribiara, de peree wɔn nkwa.

<sup>8</sup> Bere a akwatafo no duu nsraban no ano no, wɔn nyinaa wurawuraa ntamadan no mu

\* **7:3** Akwatafo nni ho kwan sε wɔkɔ nnipa mu (3 Mose 13.46).

mmaako mmaako didii, nom nsa, tasee dwetε, sikakɔkɔ ne ntade de kosiei.

<sup>9</sup> Akyiri no, wɔkeka kyεrεkyεrε wɔn ho wɔn ho se, "Nea yεreyε yi nye. Eyi ye asem papa a yεmmɔɔ obiara amanneε. Na se yεtwεn kosi adekyee a, nea εbεyε biara, asotwe bi bεda yεn so. Momma yεnkɔbɔ nnipa a wɔwɔ ahemfi no amanneε."

<sup>10</sup> Enti wɔsan baa kurow no mu, bεbɔɔ apɔnanohwεfɔ no asem a asi no ho amanneε sε woakɔ Aramfo no nsraban mu, na na obiara nni hɔ; nnyigyei biara nni hɔ. Na wɔasesa aponkɔ ne mfurum no ahama, na ntamadan no de, na ne nyinaa wɔ hɔ rεrεεrε, nanso na onipa baako koraa nni hɔ. <sup>11</sup> Aponanohwεfɔ no teεtεεs mu, kaa asem no maa nnipa a wɔwɔ ahemfi hɔ no tee.

### *Israel Wura Nsraban No Mu*

<sup>12</sup> Odasu mu na ɔhene no sore fii ne mpa so, ka kyεrε ne mpanyimfo se, "Minim asem a asi. Aramfo nim sε ɔkɔm rekum yεn nti, wɔatu afi wɔn nsraban mu, akɔtetεw wuram baabi. Wɔrehwehwε sε yεbefi kurow no mu, na wɔakyekyere yεn anikann, na wɔafa kurow no."

<sup>13</sup> Mpanyimfo no mu baako kae se, "Eye sε yεbεsoma akwansrafo, na wɔakɔhwehwε mu. Momma wɔmfα aponkɔ a wɔaka no mu anum. Sε asem bi to wɔn koraa a, εrenyε adehwere kεse biara sε wɔbεtεna ha ne yεn a yεaka no bewuwu."

<sup>14</sup> Enti wosiesiee nteaseεnam abien ne aponkɔ, na ɔhene no somaa akwansrafo kɔhwεε asem a ato Aramfo asraafo no. <sup>15</sup> Wɔkɔe ara koduu Asubɔnten Yordan, dii ntade ne ahyehyεde a

Aramfo atow agu no akyi, bere a na wɔde anikrakra reguan no. Akwansrafo no san bεbɔɔ ɔhene no amannee. <sup>16</sup> Enti Samariafo bɔɔ twi, kɔfow Aramfo nsraban no. Eno nti na εye nokware sε wɔtɔn asikresiam a wɔayam no muhumuhu lita asia saa da no, de gye dwetε gram dubaako, atoko lita du nso, na wɔtɔn de gye dwetε gram du abien, senea AWURADE hyεε ho bɔ no pεrεεpε.

<sup>17</sup> ɔhene no yii ne panyin ma ɔhwεε ɔpon no mu ahyεmfiri so, nanso nnipadɔm no twiw faa ne so ma owui. Enti biribiara baa mu pεrεεpε, senea Onyankopɔn nipa no hyεε ho nkɔm bere a ɔhene no baa ne fi no. <sup>18</sup> Onyankopɔn nipa no ka kyereε ɔhene no se, “Ebedu ɔkyena sesεε, wɔbεtɔn asikresiam muhumuhu lita nsia agye dwetε gram du baako wɔ Samaria gua biara so. Na atoko nso, wɔbεtɔn lita du agye dwetε gram du abien.”

<sup>19</sup> ɔhene no panyin no buae se, “Sε AWURADE bue ɔsoro mfensere mpo a, εremma saa da!” Na Onyankopɔn nipa no kae se, “Wubehu sε εbεba mu saa, nanso worenni emu biara bi.” <sup>20</sup> Eno ara na εbaa mu, nnipa twiw faa ne so, kum no wɔ ɔpon no ano.

## 8

### *Sunemnibea No San Kɔ Ne Kurom*

<sup>1</sup> Na Elisa aka akyerε ɔbea a onyan ne ba no se, “Wo ne wo fifo ntu nkɔ baabi foforo, efise AWURADE ahyε sε ɔkɔm mmra Israel mfe ason.”

<sup>2</sup> Enti ɔbea no yεε senea Onyankopɔn nipa no

hyεε no. Ḍfaa ne fifo kɔtenaa Filistifo asase\* so mfe ason.

<sup>3</sup> Ḍkɔm no twaa mu no, ɔsan baa Israel asase so, kohuu ɔhene no se ɔregye ne fi ne n'asase.

<sup>4</sup> Na ɔhene no ne Gehasi a ɔyε Onyankopɔn nipa no somfo rekasa. Na ɔhene no rebisa se: Ka nneεma akεse a Elisa aye no bi kyεε me. <sup>5</sup> Saa bere no ara na na Gehasi reka nyan a Elisa nyan abarimaa bi no ho aseɛ akyεε no. Bere koro no ara mu na abarimaa no na kɔɔ ɔhene no anim, kɔsreε ɔhene no se ɔmfa ne fi ne ne dan mma no no.

Gehasi teεε mu se, “Hwε, me wura! Ḍbea no ni na, na ne babarima a Elisa nyan no no nso ni!”

<sup>6</sup> ɔhene no bisaa ɔbea no se, “Eyε nokware ana?” Ḍbea no buae se εyε ampa. Enti ɔhene no ka kyεε ne mpanyimfo no mu baako se ɔnhwε na biribiara a wahwere no, wɔmfα mma no. Ne nnɔbae a wotwae a na onni hɔ nyinaa, wɔde maa no.

### *Hasael Kum Ben-Hadad*

<sup>7</sup> Na Elisa kɔɔ Damasko a εyε Aram kuropɔn no mu a na ɔhene Ben-Hadad yare da no. Obi ka kyεε ɔhene no se, “Onyankopɔn nipa no aba hɔ,” <sup>8</sup> na ɔka kyεε Hasael se, “Fa akyεde kɔma Onyankopɔn nipa no. Na ka kyεε no, na ommisa AWURADE se, ‘Me ho bεtɔ me bio ana?’”

<sup>9</sup> Na Hasael hyεhyεε yoma aduanan so nnepa a efi Damasko,<sup>†</sup> se akyεde a ɔde rekɔma Elisa.

---

\* **8:2** Na Filistiman no yε asase pa sen Israel mmeρɔw mmeρɔw so no. Afei na Siria asraafo nhunahuna saa ɔman no. † **8:9** Na Damasko yε guaman a εyε Misraim, Asia Kumaa ne Mesopotamia ntam.

ɔkɔɔ ne nkyɛn ka kyereɛ no se, “Wo somfo Ben-Hadad a ɔyɛ Aramhene asoma me wo nkyɛn se mimmebisɛ se, ‘Menya ahoto ana?’”

<sup>10</sup> Na Elisa ka kyereɛ no se, “Kɔ na kɔka kyereɛ no se, ‘Wubunya ahoto.’ Nanso AWURADE ada no adi akyereɛ me sɛ, nea εbeyɛ biara, obewu.” <sup>11</sup> Elisa hwɛɛ Hasael anim, kosii sɛ Hasael yɛɛ basaa. Na Onyankopɔn nipa no fii ase sui. <sup>12</sup> Hasael bisae se, “Adɛn na me wura resu?” Elisa buae se, “Efise minim bɔne a wobeyɛ Israelfo. Wobehywɛ wɔn nkurow a wɔabobo ho ban, akunkum wɔn mmerante, de wɔn mma nketewa adwiradwira fam, apaapae apemfo yafunu!”

<sup>13</sup> Na Hasael buae se, “εbeyɛ dɛn na me a mense hwɛɛ yi, betumi adi dwuma kɛse a ete see yi?”

Elisa buae se, “AWURADE akyereɛ me se, wo na wobeyɛ Aramhene.”

<sup>14</sup> Bere a Hasael san kɔe no, ɔhene no bisaa no se, “Asem bɛn na Elisa ka kyereɛ wo?”

Hasael buae se, “ɔka kyereɛ me sɛ, nea εbeyɛ biara, wo ho bɛyɛ wo den.” <sup>15</sup> Nanso ade kyeɛ no, Hasael faa ntama a mu yɛ duru, de nuu nsu mu, de kataa ɔhene no anim, kosii sɛ owui. Na Hasael sii n'anan mu sɛ Aramhene.

### *Yehoram Di Yudahene*

<sup>16</sup> ɔhene Yehosafat babarima Yehoram bedii Yuda so bere a ɔhene Yoram adi ade wɔ Israel mfe anum. Na Yoram yɛ Ahab babarima. <sup>17</sup> Bere a Yehoram dii hene no, na wadi mfe aduasa abien. Odii ade wɔ Yerusalem mfirihyia awotwe.

<sup>18</sup> Nanso Yehoram dii Israel ahemfo anammɔn

akyi. Na ɔyε omumɔyεfo te sε ɔhene Ahab, efisε na waware Ahab mmabεa no mu baako. Na Yehoram yεε nea na εyε bɔne wɔ AWURADE ani so. <sup>19</sup> Nanso na AWURADE mpre se ɔsεe Yuda, efisε na ɔne Dawid aye apam, ahye bɔ sε, n'asefo na wɔbεkɔ so adi ɔman no so afebɔɔ.

<sup>20</sup> Yehoram bere so na Edomfo sore tiaa Yuda, na wosii wɔn ankasa wɔn hene. <sup>21</sup> Enti Yehoram faa ne nteaseεnam nyinaa, kɔtow hyεε Sair kurow so. Edomfo twaa ɔne ne nteaseεnamkafo ho hyiae, nanso ɔfaa anadwo sum no mu guanee. Yehoram asraafo nso guanee. <sup>22</sup> Edom atew Yuda so atua de besi nnε. Saa bere no ara mu na Libna kurow nso sore tiae.

<sup>23</sup> Nsem a esisii wɔ Yehoram ahenni mu ne nea ɔyεε nyinaa no wɔankyerεw angu Yuda Ahemfo Abakɔsem Nhoma no mu ana? <sup>24</sup> Bere a Yehoram wui no, wosiee no wɔ ne mpanyimfo nkyen wɔ Dawid kurom. Na ne babarima Ahasia na odii n'ade sε ɔhene.

### *Ahasia Di Hene Wɔ Yuda*

<sup>25</sup> Yehoram babarima Ahasia fii ase dii hene wɔ Yuda wɔ ɔhene Yoram<sup>‡</sup> addedi wɔ Israel ne mfe dumien mu no mu. Na Ahab babarima ne ɔhene Yoram no. <sup>26</sup> Bere a Ahasia dii ade no, na wadi mfirihyia aduonu abien, na odii ade wɔ Yerusalem afe. Ne na ne Atalia a na ɔyε Israel-hene Omri nena. <sup>27</sup> Ahasia dii amumɔyεsem, dii bɔne a ɔhene Ahab fifo yεε no anammɔn akyi. ɔyεε amumɔyεsem wɔ AWURADE ani so, efisε wɔbɔɔ ne din bataa aware a ɔkɔwaree Ahabfini no ho.

---

<sup>‡</sup> **8:25** Na wɔfrε Yoram yere se Atalia. Na ɔyε Ahab babea.

<sup>28</sup> Ahasia de ne ho kɔbɔɔ Israelhene Yoram ho wɔ ne ko a ɔko tiaa Aramhene Hasael wɔ Ramot-Gilead no. <sup>29</sup> Bere a wopiraa ɔhene Yoram wɔ ɔko no mu no, ɔsan baa Yesreel sε ɔrebɛsa n'apirakuru no. Bere a Yoram wɔ hɔ no, Yudahene Ahasia kɔsraa no.

## 9

### *Wosi Yehu Israelhene*

<sup>1</sup> Na odiyifo Elisa afre adiyifo no mu baako afi adiyifokuw no mu. ɔka kyere se, "Siesie wo ho, na kɔ Ramot-Gilead. Fa saa toa a ngo wɔ mu yi ka wo ho kɔ. <sup>2</sup> Hwehwε Yehosafat babarima Yehu a ɔye Nimsi nena no. Frε no fi ne nnamfo mu, na fa no kɔ pia mu, <sup>3</sup> na hwie ngo no gu ne tirim. Ka kyere se, 'Senea AWURADE se ni: Meresra wo ngo, ama woabedi Israel so hene.' Afei, bue ɔpon no na guan, nsεe bere!"

<sup>4</sup> Enti odiyifo kumaa no kɔɔ Ramot-Gilead. <sup>5</sup> Oduu hɔ no, ohuu Yehu sε ɔne asraafo mpany-imfo bi reye nhiamu. ɔkae se, "ɔsahene, mewɔ nkra bi de ma wo."

Yehu bisae se, "Yεn mu hena?"

Obuae se, "Wo a woye ɔsahene no."

<sup>6</sup> Enti Yehu gyaw wɔn a aka no hɔ, kɔɔ fie. Na odiyifo kumaa no hwiee ngo no guu Yehu tirim, kae se, "Senea AWURADE, Israel Nyankopɔn, se ni: Mesra wo ngo se di AWURADE nkurofo Israelfo so hene. <sup>7</sup> ɔsε sε wosee Ahab, wo wura no, fi. Saa ɔkwan no so na mεfa atua m'adiyifo a wokunkum wɔn ne AWURADE asomfo no nyinaa a Isebel kunkum wɔn no so ka. <sup>8</sup> ɔsε sε wɔpepa Ahabfifo nyinaa fi hɔ—ɔbarima biara,

ɔsomfo ne nea ɔde ne ho nyinaa a wɔwɔ Israel.

<sup>9</sup> Mesee Ahab fi, senea meseee Nebat babarima Yeroboam ne Ahiya babarima Baasa afi no. <sup>10</sup> Na akraman bewe Isebel nam wɔ Yesreel asase so, na obiara rensie no.” Afei, odiyifo kumaa no buue pon no, tuu mmirika guanee.

<sup>11</sup> Yehu san kɔɔ ne nkurofo mpanyimfo no nkyen. Wɔn mu baako bisaa no se, “Den na damfo a ne ti asee no rehwehwε? Biribiara kɔ yiye ana?” Yehu buae se, “Wo ara wunim senea ɔbarima no keka ne nsem fa.”

<sup>12</sup> Wɔn nyinaa kae se, “Woboa. Ka nokware.” Enti Yehu kae se, odiyifo no ayi akyere no se AWURADE asra no ngo se ommedi Israel so hene.

<sup>13</sup> Wɔde wɔn ntade sesew atrapoe no so ntɛm ara, hyɛn torobɛnto, teeteεε mu se, “Yehu yε ɔhene.”

### *Yehu Kum Yoram Ne Ahasia*

<sup>14</sup> Enti Yehosafat babarima Yehu a ɔyε Nimsi nena pam ɔhene Yoram ti so. Afei, na Yoram de ne ho akɔbɔ asraafo wɔ Ramot-Gilead a na wogyina de tia Aramhene Hasael asraafo no.

<sup>15</sup> Nanso na wɔapira Yoram wɔ ɔko no mu, ama wasan aba Yesreel sε ɔrebɛsa ne ho yare. Enti Yehu ka kyereε mmarima a wɔka ne ho no se, “Esiane sε mope sε midi hene no nti, obiara nnguan nkɔ Yesreel nkɔka nea yεayε wɔ hɔ no.”

<sup>16</sup> Na Yehu kɔtenaa teaseεnam mu, kɔɔ Yesreel kɔhwehwεε ɔhene Yoram a na wapira da hɔ no. Na Yudahene Ahasia nso wɔ hɔ bi.

<sup>17</sup> ɔwɛmfo a na ɔwɔ Yesreel abantenten so no huu Yehu ne ne nkurofo sε wɔreba nti, ɔteεε mu guu Yoram so se, “Mihu sε asraafo reba.

Soma ɔpɔnkɔkafo bi, na ɔnkɔhwε se wɔreba no asomdwoe so ana.” Ḷhene Yoram nso teεε mu.

<sup>18</sup> Enti ɔpɔnkɔkafo no kohyiaa Yehu bisaa no se, “ᶮhene pε se ohu se moreba no asomdwoe so ana?”

Yehu buae se, “Wuhia asomdwoe de aye dεn? Di m’akyi!”

᷇wemfo no freeε ᷇hene se, “᷇pɔnkɔkafo no ahyia wɔn, nanso ɔmma.”

<sup>19</sup> Enti ᷇hene no somaα ᷇pɔnkɔkafo a ɔto so abien. Okoduu wɔn nkyen bisae se, “᷇hene pε se ohu se moreba no asomdwoe so ana?” Bio, Yehu bisae se, “Wuhia asomdwoe de aye dεn Di m’akyi!”

<sup>20</sup> ᷇wemfo no teεε mu se, “᷇pɔnkɔkafo no ahyia wɔn, nanso ɔno nso mma. Ebeyε Nimsi babarima Yehu a ɔka ɔpɔnkɔ mmirikatεntε so no.”

<sup>21</sup> ᶮhene Yoram hyεε se, “Ntεm, monyε me teaseεnam no krado mma me.” Na Israel-hene Yoram ne Yudahene Ahasia tenatena wɔn nteaseεnam mu kohyiaa Yehu. Wohyiaa no wo asase a na εyε Nabot, Yesreelni dea no so.

<sup>22</sup> ᶮhene Yoram bisae se, “Wobaa no asomdwoe so ana, Yehu?”

Yehu buae se, “Mpen dodow a wo na Isebel abosom ne ne bayi atwa yεn ho ahyia yi, εbeyε den na maba no asomdwoe so?”

<sup>23</sup> Enna ᷇hene Yoram twee ne teaseεnam pɔnkɔ no hama, de dan ɔpɔnkɔ no ani, guanee a ɔreteεεε mu se, “᷇mammɔfo Ahasia!”

<sup>24</sup> Na Yehu twee n’agyan tow wɔɔ Yoram mmati ntam. Agyan no hwirew ne koma mu ma ɔtew hwee wɔ ne teaseεnam no mu, wui.

<sup>25</sup> Yehu ka kyereεε ne kunini Bidkar se, "Tow no kyene Nabot, Yesreelni no asase no so. Wokae bere a na yεtete nteaseεnam mu, di n'agya Ahab akyi no? AWURADE kae se, <sup>26</sup> 'Meka ntam, di nsew sε, metua no so ka wɔ Nabot agyapade mu ha, sεnea AWURADE se ni,' sε okum Nabot ne ne mmabarima nnεra a mihiu no. Enti tow no kyene Nabot asase so ha, sεnea AWURADE kae no."

<sup>27</sup> Bere a Yudahene Ahasia huu asem a asi no, oguan kɔ Bet-Hagan. Yehu taa no teεεεε mu se, "Munkum ɔno nso bi." Enti wɔtow Ahasia agyan wɔ no wɔ ne teaseεnam mu wɔ Gur atrapoe a εben Yibleam. Otumi koe ara koduu Megido, na owui wɔ hɔ. <sup>28</sup> Ne mpanyimfo de no too teaseεnam mu, kɔ Yerusalem kosiee no wɔ ne mpanyimfo ho wɔ Dawid kurom. <sup>29</sup> Na Ahasia dii ade wɔ Yuda no, na Israelhene Yoram nso adi ade mfe dubaako.

### *Isebel Wu*

<sup>30</sup> Bere a ɔhemmea Isebel tee sε Yehu aba Yesreel no, ɔkekaa n'aninton, yεε ne ti fεfεεfε, tew mfensere mu. <sup>31</sup> Bere a Yehu wuraa ahemfi pon no mu no, ɔhemmea no teεεεε mu guu ne so se, "Owudifo, wobaa no asomdwoe so ana? Wote sε Simri a okum ne wura no."

<sup>32</sup> Yehu pagyaw n'ani huu no wɔ mfensere no mu teεεεε mu se, "Hena na ɔwɔ m'afa!" Na piamfo baanu anaa baasa hwεε no. <sup>33</sup> Yehu teεεεε mu se, "Montow no nkyene fam." Enti wɔtow no fii mfensere no mu, maa ne mogya bi bɔ petee ɔfasu no ne n'apɔnkɔ ho. Na Yehu maa n'apɔnkɔ tiatiaa n'amu no so.

<sup>34</sup> Na Yehu kɔɔ ahemfi hɔ kodidi, nomee. Akyiri no, ɔkae se, "Monkɔ nkosie ɔbea a wɔadome no yi, efise ɔye ɔhene babea." <sup>35</sup> Nanso wɔkɔɔ se wɔrekosie no no, ne ti ne nan ne ne nsa nko ara na wohui.

<sup>36</sup> Bere a wɔbɛbɔɔ Yehu amannee no, ɔkae se, "Eyi ne AWURADE asem a ɔnam ne somfo Tisbini Elia so kae se, 'Asasetam bi a ɛda Yesreel no so na akraman bɛwe Isebel nam no.' <sup>37</sup> Na n'amu bɛbɔ apete, te se wura wɔ Yesreel pɔw mu a ne saa nti, obiara ntumi nhu no.'

## 10

### *Yehu Kunkum Ahab Fifo*

<sup>1</sup> Na Ahab wɔ mmabarima aduɔson a wɔtete Samaria.\* Na Yehu kyerew krataa, kyekyε maa kurow no mpanyimfo, ntuanofo ne wɔn a wɔhwε Ahab mmabarima no so no. Na krataa no ka se, <sup>2</sup> "ɔhene mmabarima no wɔ mo nkyεn. Ne nteaseεnam, n'apɔnκɔ, kurow a wɔabɔ ho ban ne akode nyinaa nso saa ara. Se mo nsa ka saa krataa yi ara pε a, <sup>3</sup> munyi ɔhene Ahab mmabarima no mu nea ɔfata a ɔwɔ mu no, na munsi no mo so hene, na munsiesie mo ho nko mma Ahab fi."

<sup>4</sup> Nanso wɔbɔɔ huboa kae se, "Ahemfo baanu† mpo antumi annyina, antia saa ɔbarima yi! Na dɛn na yebetumi aye?"

<sup>5</sup> Enti mpanyimfo a wɔhwε ahemfi hɔ ne kurow no so ne ntuanofo ahorow no ne wɔn

---

\* **10:1** Na Samaria ye Atifi Ahemman no kuropɔn fi ɔhene Omri bere so (1 Ah 16.24). † **10:4** Ahemfo baanu a wɔreka wɔn ho asem yi ye Yoram ne Ahasia (9.22-28).

a wɔhwɛ ɔhene mmabarima so no de saa nkra yi kɔmaa Yehu se, “Yεyε wo nkOA, na biribiara a wobɛka sε yεnyε no, yεbεyε. Yεrensi obiara hene. Nea wususuw sε eye biara no, yε.”

**6** Yehu kyereW krataa a eto so abien de buae se, “Sε mowɔ m'afa, na mubetie m'asem de a, ɔkyena sesεε mmere mu, momfa ɔhene no mmabarima ti mmre me wɔ Yesreel.”

Na Samaria ntuanofo bi na wɔhwɛ ɔhene mmabarima aduɔson no so a wɔatetew wɔn fi wɔn mmofraase pεε. **7** Krataa no duu ara pε, na ntuanofo no kunkum ɔhene no mmabarima aduɔson no nyinaa. Wɔde wɔn ti no guu nkenten mu, na wɔde kɔmaa Yehu wɔ Yesreel. **8** ɔbɔfo kɔɔ Yehu nkyen kɔka kyereε no se, “Wɔde ɔhene mmabarima no ti no aba.” Enti Yehu hyεε se, “Mommoaboa ano akuw abien wɔ kurow no pon ano, na munnyaw hɔ nkosi adekyee.”

**9** Ade kyee no, ɔkɔkasa kyereε dɔm a wɔahyia hɔ no se, “Ense sε obi bɔ mo sobo. Me na mebɔɔ pɔw, de tiaa me wura, nam so kum no. Na hena na okunkum eyinom? **10** Nea εwɔ hɔ ne sε, εsε sε asem a efi AWURADE nkyen a wɔka faa Ahab fi ho no ba mu. AWURADE nam ne somfo Elia so daa no adi sε eyi bεba mu.” **11** Na Yehu kunkum Ahab abusuafO a wɔtete Yesreel no ne ne mpanyimfo atitiriw ne nnamfonom ne n'akɔmfO nyinaa. Enti anka Ahab aseni biara.

**12** Na Yehu fii hɔ kɔɔ Samaria. ɔrekɔ no, ɔkɔdaa Bet-Eked nguanhwεfo ahɔhodan mu. **13** Ohyiaa Yudahene Ahasia abusuafO bi. Obisae se, “Moyε hefo?”

Wobuae se, "Yεyε ɔhene Ahasia abusuafo. Yerekɔsra ɔhene Ahab mmabarima ne ɔhemmea no."

<sup>14</sup> Yehu teεε mu, ka kyerεε ne mmarima se, "Monkyere wɔn anikann." Na wɔkyekyeree nnipa aduanan abien no nyinaa kunkum wɔn wɔ Bet-Eked abura so. Wannyaw wɔn mu biara.

<sup>15</sup> Bere a Yehu fii hɔ no, ohyiaa Rekab<sup>‡</sup> babarima Yehonadab a na ɔrebehyia no. Wokyiakyiaa wɔn ho wiei no, Yehu bisaa no se, "Wowɔ me ho adwene pa, senea mewɔ wo ho adwene pa no ana?"

Yehonadab buae se, "Yiw."

Yehu toaa so se, "Sε εte saa de a, kyia me." Yehonadab teεε ne nsa ma Yehu kyiaa no, de no tenaa teaseεnam no mu. <sup>16</sup> Na Yehu kae se, "Afei, wo ne me nkɔ, na hu senea mede me ho ama AWURADE no." Enti Yehonadab ne no tenaa teaseεnam no mu koe.

<sup>17</sup> Bere a Yehu duu Samaria no, okunkum Ahab fifo a wɔaka wɔ hɔ no nyinaa, senea AWURADE nam Elia so hyεe no.

### *Yehu Kum Baal Akɔmfo*

<sup>18</sup> Na Yehu frεε nnipa a wɔwɔ kurow no mu no nyinaa nhylamu, ka kyerεε wɔn se, "Ahab som Baal kakra; Yehu bɛsom no yiye. <sup>19</sup> Momfrɛ Baal adiyifo, asomfo ne n'akɔmfo nyinaa mmra. Monhwε se wɔn mu biara bɛba, efisε merebɛbɔ Baal afɔre kεse. Obiara a ɔsom Baal a wamma

---

<sup>‡ 10:15</sup> Na Rekabfo no yε Rekab asefo a na wɔda so te ase wɔ Yeremia bere so (Yer 35.6,8). Na wɔpε se wɔben Awurade yiye. Na wodi atutena. Na wɔyε Kenifo a Yetro a na ɔyε Mose agya nsiananmu ase fi wɔn mu.

no, wobekum no.” Na Yehu redaadaa wɔn, senea ɔbesee wɔn a wɔsom Baal no nyinaa.

<sup>20</sup> Afei, Yehu hyεε se, “Munhyia, mmɔ gua anibere so, na monsore Baal!” Enti wɔyεε saa. <sup>21</sup> ɔsomaabɔfo kɔɔ Israel mmaa nyinaa, kɔfrees wɔn a wɔsom Baal no nyinaa. Wɔn nyinaa ba bεhyεε Baal abosomfi§ hɔ ma tɔ, fi ti kosi ti. <sup>22</sup> Na Yehu hyεε nea ɔhwε ntadedaka no so no se, “Hwε ma obiara a ɔsom Baal no nhye batakari yi baako.” Enti wɔkyekyεε batakari maa wɔn.

<sup>23</sup> Na Yehu ne Rekab babarima Yehonadab kɔɔ Baal abosomfi hɔ. Yehu ka kyereε Baal asomfo no se, “Monhwε se wɔn a wɔyε Baal asomfo no nko ara na wɔwɔ ha. Mommma obiara a ɔsom AWURADE no mma mu.” <sup>24</sup> Enti na wɔn nyinaa wɔ abosomfi hɔ rekɔbɔ afɔre ne ɔhyew afɔre. Yehu de n'asraafo aduɔwɔtwe twaa ɔdan no ho hyiae, hyεε wɔn se, “Sε moma obi guan a, mo ara mode mo nkwa betwa so.”

<sup>25</sup> Yehu wiee ɔhyew afɔre no bɔ ara pε, ɔhyεε n'awεmfo ne ne mpanyimfo no se, “Munkokunkum wɔn nyinaa. Mommma ɔbaako koraa nguan!” Enti wɔde wɔn afoa kunkum wɔn nyinaa. Na awεmfo no ne mpanyimfo no twee wɔn amu no beguu abɔnten. Yehu asraafo no kɔɔ Baal abosomfi no aban mu. <sup>26</sup> Wɔtwee Baal adum no a na wɔde som no no, sεee no. <sup>27</sup> Wobubuu Baal adum no, sεee n'abosomfi no pasaa, de hɔ yεε ɔmanfo agyananbea. Na εda so yε agyananbea de besi nne.

<sup>28</sup> Yehu nam saa ɔkwan yi so, de tɔree Baalsom ase korakora wɔ Israelman mu. <sup>29</sup> Nanso Yehu

---

§ **10:21** Ahab na osii Baal abosomfi no (1 Ah 16.32).

ansee sika nantwimma a εω̄ Bet-El ne Dan no; wantwe ne ho amfi bōne kese a Nebat babarima Yeroboam dii Israelfo anim ma wɔyee no ho.

<sup>30</sup> Na AWURADE ka kyereε Yehu se, “Woayε ade sε wutiee m’asəm, nam so sεee Ahab fifo. Ne saa nti, mεma w’asefo adi ahene wō Israel, akosi awo ntoatoaso anan so.” <sup>31</sup> Nanso Yehu amfa ne koma anni AWURADE, Israel Nyankopōn mmara no so. Wantwe ne ho amfi ahonisom a Yeroboam dii Israelfo anim, ma wɔyee no ho.

### *Yehu Wu*

<sup>32</sup> Saa mmere no, AWURADE fii ase tew Israel asase no kese so. Ḷhene Hasael dii ɔman no afaafaa bebree so <sup>33</sup> wō Asubonten Yordan apuei fam wō Gilead nyinaa, a Gad, Ruben ne Manase ka ho. Odii asase a efi Aroer kurow a εda Arnon Subon ho, de kosi atifi fam wō Gilead ne Basan.

<sup>34</sup> Na Yehu ahenni mu nsem a esisii, ne dwuma ahorow a odii ne nea otumi yee no, wɔankyerew angu Israel Ahemfo Abakɔsem Nhoma no mu ana?

<sup>35</sup> Bere a Yehu wui no, wosiee no wō ne mppanyimfo nkyen wō Samaria. Na ne babarima Yehoahas na odii n’ade sε ɔhene. <sup>36</sup> Nna a Yehu de dii Israel so wō Samaria no yε mfe aduonu awotwe.

## 11

### *Atalia Di Yudahene*

<sup>1</sup> Bere a Yudahene Ahasia, ne na Atalia tee sε ne babarima no awu no, ɔkoe sε ɔrekɔsse adehyebusua a aka no. <sup>2</sup> Nanso Ahasia nuabea

Yehoseba\* a na ɔyε ɔhene Yehoram babea no faa Ahasia ba abarimaa ketewa Yoas,† yii no fii ɔhene no mma a anka wɔrebekunkum wɔn no mu. Yehoseba de Yoas ne ne gyigye fo kohintaw pia bi mu, senea Atalia renhu no. Eno nti, wɔannya abofra no ankum no. <sup>3</sup> Yoas ne nea ogyigye no no hintaw wɔ AWURADE Asoredan mu hɔ mfe asia, bere a na Atalia di ɔman no so no.

### *Atuatew A Etia Atalia*

<sup>4</sup> Atalia adedi mfe ason mu no, ɔsɔfo Yehoiada soma ma wɔkɔfaa Karifo‡ asraafo apaafø ne awɛmfo baa AWURADE asoredan mu hɔ. One wɔn yεε nhyehyεε, na ɔma wɔkcaa ntam se wobedi nokware wɔ AWURADE asoredan mu hɔ. Afei, ɔde ɔhene babarima Yoas kyereεε wɔn.

<sup>5</sup> Yehoiada ka kyereεε wɔn se, “Nea εse se moyε ni. Mo mu nkyεmu abiesa mu baako a moyε adwuma homeda no bewen ahemfi no.

<sup>6</sup> Nkyεmu abiesa mu baako nso, nwεn wɔ Sur pon no ano. Na nkyεmu abiesa mu baako a aka no nso, bewen ahemfi no akyi. Saa akuw abiesa yi nyinaa bewen ahemfi no. <sup>7</sup> Akuw abien a wɔamma adwuma homeda no nso bewen AWURADE asoredan no ama ɔhene no. <sup>8</sup> Mobeεε ɔhene ho awɛmfo kuw, a mukurakura mo akode. Onipa biara a wɔmmaa no kwan a ɔbeεen mo no, munkum no. Bere biara, mommen ɔhene no.”

\* **11:2** Esoso Yehoseba ne na na esoso Atalia nso ne na. Na Yehoseba yε ɔsɔfopanyin Yehoia yere (2 Be 22.11). Eno nti na otumi de Yoas siee Asoredan mu a na eyε ɔsɔfo no pia mu no.

† **11:2** Na Yoas nnii afe nti na wontwaa no nufu ε (nkyekyεmu 31; 12.1). ‡ **11:4** Na Karifo yε ahɔho asraafo a wɔbɔ wɔn paa a wofi Asia Kumaa mu. Wɔn na wobesii Keritifo anan wɔ Dawid bere so (2 Sam 8.18).

<sup>9</sup> Na asahene no dii biribiara a ɔsɔfo Yehoiada hyεε sε wɔnyε no so pεrεεpε. Asahene no faa asraafo a wɔbaa adwuma homeda no ne wɔn a wɔakɔ adwuma da no no. Wɔde wɔn nyinaa baa ɔsɔfo Yehoiada anim. <sup>10</sup> ɔmaa wɔn mpeaw ne nkatabo a na bere bi εyε ɔhene Dawid de a na wɔakora wɔ AWURADE asɔredan mu hɔ no. <sup>11</sup> Awεmfo no gyinagyinaa ɔhene no ho hyiae a wokurakura wɔn akode. Wɔsaa so tee fi asɔredan no anafo fam, de kɔfaa atifi fam, ne aforemuka no ho nyinaa.

<sup>12</sup> Na Yehoiada de ɔhene babarima Yoas no pue hyεε no ahenkyεw. ɔmaa Yoas Onyankopɔn apam no nhwεso no bi, sii no ɔhene. Wɔsraa no, na nnipa no nyinaa bɔɔ wɔn nsam, teεteεε mu se, “ɔhene nkwa so!”

### *Atalia Wu*

<sup>13</sup> Atalia tee gyegyeegye no a awεmfo no ne nnipa no reyε no, ɔyεε ntεm kɔɔ AWURADE asɔredan mu hɔ, kɔhwεε nea εrekɔ so. <sup>14</sup> Ohuu sε ɔhene foforo no gyina beae bi a εkyεrε ne tumi wɔ afadum no ho, sεneα amanne kyεrε wɔ ahensi mu no. Na mpanyimfo ne torobεntohyεnfo atwa ne ho ahyia. Na nnipa a wofi asase no so mmaa nyinaa redi ahurusi rehyεn torobento. Bere a Atalia huu eyinom nyinaa no, ɔde ahometew sunsuan ne ntade mu teεteεε mu sε, “Amammɔsεm! Amammɔsεm!”

<sup>15</sup> Na ɔsɔfo Yehoiada hyεε asafohene a wɔhwε asraafo no so no sε, “Momfa no mfi asɔredan mu ha, na munkum obiara a ɔpε sε ogye no. Munnkum no wɔ AWURADE asɔredan mu ha.” <sup>16</sup> Enti wɔtwee no de no kɔɔ ɔkwān a aponkɔ fa so ba ahemfi hɔ no so, kum no wɔ hɔ.

### *Yehoiada Gyidisom Mu Nsakrae*

<sup>17</sup> Na Yehoiada ne ɔhene no ne ɔmanfo no yee apam sε, wɔbεyeε AWURADE nkurofo. ɔsan yee apam too ɔhene no ne nnipa no ntam. <sup>18</sup> Na nnipa a wɔwɔ asase no so nyinaa kɔɔ Baal abosonnan mu, kobubu guu fam. Wobubuu afɔremuka ne ahoni ahorow no nyinaa asinasin, kum Baal kɔmfo Matan nso wɔ afɔremuka no anim. ɔsɔfo Yehoiada maa awɛmfo wen AWURADE asɔredan no. <sup>19</sup> Na asahene, Karifo asraafo apaafø, awɛmfo no ne nnipa a wɔwɔ asase no so nyinaa dii ɔhene no akyi, de no pue ffi AWURADE asɔredan no mu. Wɔfaa awɛmfo no pon no ano, kɔɔ ahemfi hɔ, na ɔhene no kɔtenaa ahengua no so. <sup>20</sup> Enti nnipa a wɔwɔ asase no so nyinaa dii ahurusи, na asomdwoe baa kuropɔn no mu, efise wɔakum Atalia wɔ ahemfi.

<sup>21</sup> Yoas bedii ade no, na wadi mfirihyia ason.

## 12

### *Yoas Siesie Asɔredan No*

<sup>1</sup> ɔhene Yehu adedi wɔ Israel no mfe ason so, na Yoas\* nso dii ade wɔ Yuda. Odii ade wɔ Yerusalem mfe aduanan. Na ne na Sibia fi Beer-Seba. <sup>2</sup> Yoas asetena mu nyinaa, ɔyεε nea εε AWURADE ani, efise na ɔsɔfo Yehoiada kyerɛkyere no. <sup>3</sup> Nanso wansεe abosonnan a na nnipa kɔbɔ afɔre, kɔhyew nnuhuam wɔ hɔ no.

<sup>4</sup> Da bi, ɔhene Yoas ka kyerɛɛ asɔfo no se, "Mommoaboa sika a wɔde ba AWURADE asɔredan mu sε afɔrebɔde kronkron no, sε εye daa daa towtua, aboade anaa akyεde a efi ɔpε mu no.

---

\* **12:1** ɔno ara na wɔfrε no Yehoas wɔ Hebri kasa mu

<sup>5</sup> Momma asɔfo no mfa sika no bi nkotua asɔredan no asiesie ho ka biara.” <sup>6</sup> Nanso ɔhene Yoas dii ade mfe aduonu abiesa no, na asɔfo no nsiesie Asɔredan no. <sup>7</sup> Enti ɔhene Yoast<sup>†</sup> soma kɔfrees Yehoiada ne asɔfo a wɔaka no, bisaa wɔn se, “Aden nti na munsiesiee asɔredan no? Mommfa akyɛde no nhye mo ho bio. Efi nnɛ rekɔ, eṣe se mode ne nyinaa siesie asɔredan no.” <sup>8</sup> Enti asɔfo no penee so se wɔrennyigye sika mfi nnipa no nkyɛn bio. Wɔpenee so nso se, wɔn ankasa rensiesie Asɔredan no.

<sup>9</sup> Na ɔsɔfo Yehoiada tuu tokuru wɔ adaka kese bi atifi, de sii afɔremuka no nifa so wɔ AWURADE Asɔredan no kwan ano. Asɔfo a wɔwɛn ɔkwan no ano no de nnipa no ntoboa nyinaa guu adaka no mu. <sup>10</sup> Bere biara a adaka no bɛyɛ ma no, asɔre kyereɛfo ne ɔsɔfopanyin no kan sika a wɔde aba AWURADE Asɔredan no mu no nyinaa, de gu nkotoku mu. <sup>11</sup> Afei, wɔde sika no ma dwumadi sohweɛfo no ma wɔde tua nnipa a wɔyɛ AWURADE Asɔredan no ka—nnua adwumfo, adansifo, <sup>12</sup> abohyehyɛfo ne abotwafo. Wɔde sika no bi nso tɔ nnua ne abo a wɔatwa, a wɔde besiesie AWURADE asɔredan no. Na ka biara a eba Asɔredan no asiesie ho no, wotua.

<sup>13</sup> Na wɔamfa sika a wɔde bɛba Asɔredan mu hɔ no anyɛ dwetɛ nkuruwa, akanea adabaw, nkankye akɛse, ntorobento anaa nneɛma a wɔde sikakɔkɔɔ anaa dwetɛ yɛ ma AWURADE Asɔredan no. <sup>14</sup> Na wɔde tuaa adwumayɛfo no ka, ma wɔde siesiee asɔredan no. <sup>15</sup> Na adwuma no hwɛfo akontaabu biara ho anhia, efisɛ na wɔyɛ adwumayɛfo nokwafo. <sup>16</sup> Nanso

---

<sup>†</sup> **12:7** Saa bere no na Yoas adi mfe aduasa.

afədi ne bɔneyε ho afɔrebɔde no de, na wɔmfa nkɔ AWURADE Asɔredan mu hɔ. Na wɔde ma asɔfo no se wɔn kyɛfa.

### *Yoas Ahenni Awieɪ*

<sup>17</sup> Saa bere no ntam ara na Aramhene Hasael kɔko tiaa Gat, na ɔfaa ɔman no. Afei, ɔdan ne ho kɔtow hyεε Yerusalem so. <sup>18</sup> ɔhene Yoas boaboaakronkronne a Yehosafat, Yehoram ne Ahasia a na wɔyε Yuda ahemfo a wɔatwa mu no ato din ama AWURADE ne nea ɔno ankasa nso ato din ama AWURADE no nyinnaa ano. ɔde ne nyinnaa a sikakɔkɔɔ a εwɔ akorae a εwɔ Awurade asɔredan mu hɔ ne ahemfi no kaa ho no kɔmaa Aramhene Hasael. Enti ɛmaa Hasael twee ɔsa a anka ɔretu wɔ Yerusalem so no sanee.

<sup>19</sup> Nsem a esisi wɔ Yoas ahenni mu ne nea ɔyεε no nyinnaa, wɔankyerew wɔ Yuda Ahemfo Abakɔsem Nhoma no mu ana? <sup>20</sup> Nanso ne mpanyimfo pam ne ti so, kum no wɔ Bet-Milo kwan a εkɔ Sila no so. <sup>21</sup> Awudifo no yε Simeat babarima Yosabad ne Somer babarima Yehosabad a na wɔn nyinnaa yε afotufo nokwafo. Wosiee Yoas wɔ n'agyanom nkyen wɔ Dawid kurom. Na ne babarima Amasia na odii n'ade se ɔhene foforo.

## 13

### *Yehoahas Di Israelhene*

<sup>1</sup> Bere a Yehu babarima Yehoahas fii ase dii hene wɔ Israel no, na ɔhene Yoas nso adi ade mfe aduonu abiɛsa wɔ Yuda. Odii ade mfe dunson wɔ Samaria. <sup>2</sup> Nanso ɔyεε bɔne wɔ AWURADE ani so. Odii Nebat babarima Yeroboam nhwɛso akyi, toaa ahonisom a odii Israelfo no anim yεε no so.

<sup>3</sup> Enti AWURADE bo fuw Israelfo, na ɔmaa ɔhene Hasael a ofi Aram ne ne babarima Ben-Hadad kwan ma wodii wɔn so mfe bebree.

<sup>4</sup> Na Yehoahas bɔɔ AWURADE mpaε, sreeε ne mmoa. AWURADE tiee ne mpaεbɔ. Na AWURADE huu nhyesotraso a Aramhene de maa Israelfo no. <sup>5</sup> AWURADE yii ogyefo bi ma obegyee Israelfo no fii Aramfo nhyesotraso no ase. Na Israelfo no tenaa ase ahoto mu bio, senea na wɔte kan no. <sup>6</sup> Nanso wɔkɔɔ so yεε bɔne, wodii Yeroboam nhwεsobɔne no akyi. Na mpo, wosii Asera dua wɔ Samaria.

<sup>7</sup> Na Yehoahas asraafo no so atew abεyε apɔnkɔsotefo aduonum, nteaseεnam du ne anammɔnmufo asraafo mpem du. Na Aramhene akunkum nkae no aye wɔn se awiporowbere mfutuma wɔ ne nan ase.

<sup>8</sup> Yehoahas ahenni mu nneεma a esisii, dwuma a odii ne nea ne tumidi kɔpem nyinnaa, wɔankyerew wɔ Israel Ahemfo Abakɔsem Nhoma no mu ana? <sup>9</sup> Bere a Yehoahas wui no, wosiee no wɔ Samaria wɔ ne mpanyimfo nkyεn. Na ne babarima Yehoas\* dii n'ade se ɔhene.

### *Yehoas Di Israelhene*

<sup>10</sup> Yehoahas babarima Yehoas fi ase dii Israel so wɔ bere a na ɔhene Yoas adi ade wɔ Yuda ne mfe aduasa ason so. Odii ade wɔ Samaria mfe dunsia. <sup>11</sup> Na ɔyεε bɔne wɔ AWURADE ani so. Wantwe ne ho amfi abosonsom a Nebat babarima Yeroboam dii Israel anim ma wɔyεε no ho. <sup>12</sup> Yehoas dwuma a odii no nkae wɔ n'ahenni mu ne ne mmaninyε nyinnaa ne ne tumi

---

\* **13:9** Oyi dii ade wɔ Israel na ne din wɔ Hebri kasa mu ne Yoas

a na ɔwɔ no ne ɔko a ɔne Yudahene Amasia koe no, wɔankyerew wɔ Israel Ahemfo Abakɔsem Nhoma no mu ana? <sup>13</sup> Bere a Yehoas wui no, wosiee no wɔ Samaria wɔ ne mpanyimfo nkyen. Na ne babarima Yeroboam a ɔto so abien dii n'ade sɛ ohene.

### *Elisa Nkɔmhye A Etwa To*

<sup>14</sup> Bere a owuyare bɔɔ Elisa no, Israelhene Yehoas kɔsraa no, na osuu no se, “M’agya! M’agya! Israel nteaseεnam ne nteaseεnamkafo!”

<sup>15</sup> Elisa ka kyereɛ no se, “Hwehwɛ tadua ne bɛmma.” Na ohene no yεɛ nea ɔkae no. <sup>16</sup> Na Elisa ka kyereɛ Israelhene no se ɔmfa ne nsa nto tadua no so. Na Elisa de ɔno ankasa ne nsa too ohene no nsa so.

<sup>17</sup> Afei, ohyeɛ se, “Bue mfensere a εkyere apuei fam no.” Na obuei. Na ɔkae se, “Tow!” Na otowee.

Na Elisa kae se, “Eyi ne AWURADE agyan a εyε Aram so nkonomidi, efise wubedi Aramfo so passaa wɔ Afek. <sup>18</sup> Afei, tase bɛmma a aka no na totow wowɔ fam.” Enti ohene no tasee, na ototow wowɔɔ fam mprensa. <sup>19</sup> Nanso Onyankopɔn nipa no bo fuw no, kae se, “Anka εse sɛ wototow sisi fam mpen anum anaa asia. Eno ansa a na anka wubedi Aram so, kosi sɛ wobetɔre wɔn ase. Enti wubedi nkonomim mprensa.”

<sup>20</sup> Elisa wui, na wosiee no. Na Moabfo afowfo kɔfom asase no so nneɛma afe biara. <sup>21</sup> Bere bi a Israelfo resie obi no, wohuu afowfo bi. Eno nti, wɔyεɛ no ntɛm tow amu no kyenee Elisa ɔboda mu. Amu no kɔkaa Elisa nnompe ara pε na owufo no nyanee, huruw gyinaa ne n'anan so!

<sup>22</sup> Na Aramhene Hasael hyεε Israelfo so bere a Ḍhene Yehoahas dii ade no nyinaa. <sup>23</sup> Nanso AWURADE huu Israelfo mmɔbɔ nti, wɔn ase antɔre. Esiane apam a na ɔne Abraham, Isak ne Yakob aye no nti, ohuu wɔn mmɔbɔ. Na ebesi nnε, ɔmpree se ɔbεtɔre wɔn ase, anaa ɔbεram wɔn afi n'anim.

<sup>24</sup> Afei, Aramhene Hasael wui, na ne babarima Ben-Hadad bedii n'ade se ɔhene. <sup>25</sup> Na Yehoahas babarima Yehoas san kogyee nkurow a Hasael gyigye fii n'agya Yehoahas nsam no. Yehoas dii Ben-Hadad so nkonim mprensa, nam so gyigye Israel nkurow no.

## 14

### *Amasia Di Hene Wɔ Yuda*

<sup>1</sup> Bere a Yoas babarima Amasia fii ase dii ade wɔ Yuda no, na ɔhene Yehoas adi ade wɔ Israel mfe abien. <sup>2</sup> Amasia dii ade no, na wadi mfe aduonu anum, na odii ade wɔ Yerusalem mfe aduonu akron. Na wɔfrɛ ne na se Yehoadin a ofi Yerusalem. <sup>3</sup> ɔyεε nea εteε wɔ AWURADE ani so, nanso anto nea n'agya Dawid yεε. Ḍhwεε n'agya Yoas nhwεso so. <sup>4</sup> Nanso, wansεe abosonnan a na nnipa kɔbɔ aforε, kɔhyew nnuhuam wɔ ho no.

<sup>5</sup> Bere a Amasia tim wɔ n'ahenni mu yiye no, okunkum mmarima a wokum n'agya a na ɔye ɔhene no. <sup>6</sup> Nanso wɔn a wokunkum wɔn no mma de, wankum wɔn, sεnea wɔakyerεw wɔ Mose Mmara Nhoma no mu no, ne sεnea AWURADE ahyε no se: Wonnkunkum agyanom, wɔn mma bɔne nti; na wonnkunkum mma,

agyanom bɔne nti. Ese se wɔn mu biara wu wɔ ne bɔne ho.

<sup>7</sup> Amasia na okunkum Edomfo mpem du wɔ Nkyene Bon no mu no. Ono ara nso na odii Sela\* so nkonom, na ɔtoo hɔ din Yokteel, din a wɔde frɛ hɔ de besi nnɛ no.

<sup>8</sup> Da bi, Amasia ka sii Israelhene a ɔye Yehoahas babarima ne Yehu nena anim se, "Behyia me ma yenko."

<sup>9</sup> Na Israelhene Yoas buaa Yudahene Amasia se, "Nsœ a ewɔ Lebanon mmerɔw so somaa abɔfo kɔɔ dutan sida nkyen kɔka kyereɛ no se, 'Fa wo babea ma me babarima aware.' Ehɔ ara na aboa bi fi wuram betiatiaa nsœ no so sɛee no. <sup>10</sup> Nokware, woadi Edom so nkonom, ama woayɛ ahantan. Ma w'ani nsɔ wo nkonomdi no, na tena wo fi. Adɛn nti na wopere wo ho kɔ ɔhaw a ede amanehunu bɛba wo ne Yudafo nyinaa so yi?"

<sup>11</sup> Na Amasia antie nti, Israelhene Yoas boaboa n'akofo ano ne no kɔkoe. Asraafo dɔm abien no hyiaa mu koe wɔ Bet-Semes a ewɔ Yuda. <sup>12</sup> Israel asraafo dii Yuda so nkonom, maa Yuda asraafo no bɔ hwetee, guan kɔɔ wɔn kurom. <sup>13</sup> Israelhene Yoas kyeree Yudahene, Yoas babarima Ahasia babarima Amasia wɔ Bet-Semes. Na Yoas bɔɔ nsra kɔɔ Yerusalem. Afei ɔhyɛɛ n'akofo no ma wodwiriw Yerusalem fasu no, fi Efraim Pon no de kosii Twɔtwɔw so Pon no, a ne tenten bɛyɛ se anammɔn ahansia no. <sup>14</sup> ɔfaa sikakɔkɔɔ, dwetɛ ne nnwinne nyinaa fi AWURADE asɔredan mu ne ahemfi adekoradan mu hɔ. ɔfaa nnipa no nnommum, na ɔsan kɔɔ Samaria.

---

\* **14:7** Sela Griik din ne Petra—Idumea kuropɔn.

<sup>15</sup> Yoas ahenni mu nsem nkae ne nea ne tumi kosii ne ako a one Yudahene Amasia dii no nyinaa, woankyerew angu Israel Ahemfo Abakosem Nhoma no mu ana? <sup>16</sup> Bere a Yoas wui no, wosiee no wo ne mpanyimfo nkyen wo Samaria. Na ne babarima Yeroboam a oto so abien na odii n'ade se ohene.

<sup>17</sup> Israelhene Yoas, Yehoahas babarima wu akyi no, Yudahene Amasia tenaa ase mfe dunum. <sup>18</sup> Amasia ahenni mu nsem nkae no, woankyerew angu Yuda Ahemfo Abakosem Nhoma no mu ana? <sup>19</sup> Wopam Amasia ti so wo Yerusalem nti, oguan koo Lakis. Nanso, n'atamfo no somaa awudifo, ma wotiw no, kokum no wo ho. <sup>20</sup> Wosan de no too oponko so, baa Yerusalem, na wosiee no wo ne mpanyimfo nkyen wo Dawid kurom.

<sup>21</sup> Yudafo sii Amasia babarima Asaria a na wadi mfe dunsia no hene. <sup>22</sup> N'agya wu akyi no, Asaria san kyekyeree Elat kurow, dan maa Yuda.

### *Yeroboam A Oto So Abien Di Israelhene*

<sup>23</sup> Yudahene Yoas babarima Amasia adedi mfe dunum mu no, Israelhene Yoas babarima Yeroboam a oto so abien bedii hene wo Israel. Odii ade wo Samaria mfirihyia aduanan baako.

<sup>24</sup> Cyee bɔne wo AWURADE ani so. Na wantwe ne ho amfi abosonsom a Nebat babarima Yeroboam maa Israelfo koo mu no ho. <sup>25</sup> Yeroboam a oto so abien gyigye Israel nsase a eda Lebo Hamat ne Nkyene Po no ntam no senea AWURADE, Israel Nyankopon nam Amitai babarima Yona, odiyifo a ofi Gat-Hefer so, hyee ho bɔ no.

<sup>26</sup> AWURADE huu senea obiara a wo Israel no reteetee, na wonni obiara a obεboa wɔn nso.

**27** Esiane sε AWURADE nkaa se ɔbεpepa Israel din koraa no nti, ᵡnam Yoas babarima Yeroboam nso so gyee wɔn nkwa.

**28** Yeroboam a ɔto so abien ahenni mu nsɛm nkae ne dwuma a odii nyinaa, nea ne tumi ano kosii, n'akodi ne nsase a ogyigye maa Israel a Damasko ne Hamat a na εwɔ Yuda nsam no nyinaa ka ho no, wɔankyerew angu Israel Ahemfo Abakɔsem Nhoma no mu ana? **29** Bere a Yeroboam wui no, wosiee no ne mpanyimfo a na wɔyε Israel ahemfo no nkyen. Na ne babarima Sakaria na odii n'ade sε ɔhene.

## 15

### *Usia Di Yudahene*

**1** Bere a Yeroboam a ɔto so abien di ade wɔ Israel no, ne mfe aduonu ason so na Amasia babarima Asaria fii ase dii ade wɔ Yuda. **2** Obedii hene no, na wadi mfe dunsia. Na odii ade wɔ Yerusalem mfirihyia aduonum abien. Na ne na din de Yekolia a ofi Yerusalem. **3** Na ɔteε wɔ AWURADE ani so, senea n'agya Amasia tee no. **4** Wansεe abosonnan a na nnipa kɔbɔ afɔre, kɔhyew nnuhuam wɔ ho no.

**5** AWURADE maa kwata yεε ɔhene no, kosii da a owui.\* Ne saa nti, na ᵡno nko te ofi bi mu. Yotam† a na ɔyε ɔhene no babarima na ɔhwεε ahemfi no so, na odii nnipa a wɔwɔ asase no so no so.

**6** Na Asaria adedi ho nsɛm nkae ne dwuma a odii nyinaa no, wɔankyerew angu Yuda Ahemfo

---

\* **15:5** Senea 2 Be 26.16-21 kyere no, Onyankopɔn maa kwata yεε ɔhene no, efise na wagye ɔsɔfo no adwuma (hwe 3 Mose 13.46).

† **15:5** Yotam dii ade Asaria nkwanna a aka no mu.

Abakɔsem Nhoma no mu ana? <sup>7</sup> Asaria wui no, wosiee no wɔ ne mpanyimfo nkyen wɔ Dawid kurow mu. Na ne babarima Yotam na odii n'ade se ɔhene.

### *Sakaria Di Israelhene*

<sup>8</sup> Yudahene Asaria dii ade no, ne mfe aduasa awotwe mu no na Yeroboam a ɔto so abiɛn babarima Sakaria nso dii ade Israel wɔ Samaria. Odii ade asram asia. <sup>9</sup> ɔyεε bɔne wɔ AWURADE ani so, senea n'agyanom yεε no. Wamfi ahonisom a Nebat babarima Yeroboam maa Israelfo som no ho.

<sup>10</sup> Na Yabes babarima Salum bɔɔ pɔw de tiaa Sakaria, kum no wɔ bagua mu, dii akongua no. <sup>11</sup> Sakaria dwuma a odii nkae no, wɔankyerew angu Israel Ahemfo Abakɔsem Nhoma no mu ana? <sup>12</sup> Enti, AWURADE asem a ɔka kyereεε, Yehuse, "W'asefo na wɔbεyeε Israel ahemfo akosi awo ntoatoaso a εto so anan" mu no, baa mu.

### *Salum Di Israelhene*

<sup>13</sup> Yabes babarima Salum bedii Israel so hene no, na εyε Yudahene Usia adedi mfe aduasa akron mu. Salum dii ade wɔ Samaria ɔsram baako pe. <sup>14</sup> Afei, Gadi babarima Menahem fii Tirsa kɔɔ Samaria. ɔkɔtow hyεε Yabes babarima Salum so kum no, na ɔtenaa akongua no so.

<sup>15</sup> Salum ahenni ho nsɛm nkae ne pɔw a ɔbɔe no, wɔankyerew angu Israel Ahemfo Abakɔsem Nhoma no mu?

### *Menahem Di Israelhene*

<sup>16</sup> Saa bere no mu, Menahem fii Tirsa kɔtoaa Tifsa ne obiara a ɔwɔ hɔ ne ne nkurow nyinaa, efise εhɔfo no ampene so se wɔde kurow no

bema. Okunkum kurow no mu nnipa nyinaa, paapae emu apemfo nyinaa yafunu mu.

<sup>17</sup> Gadi babarima Menahem fii ase dii Israehene bere a na Usia adi ade wɔ Yuda ne mfe aduasa akron so. Odii hene wɔ Samaria mfirihyia du. <sup>18</sup> Nanso Menahem yεε bɔne wɔ AWURADE ani so. N'ahenni mu nyinaa, wannyaε bɔne a εyε ahonisom no a na Nebat babarima Yeroboam adi Israelfo anim de wɔn asom no.

<sup>19</sup> Afei, Asiriahene Pul<sup>‡</sup> bedii asase no so. Na Menahem tuaa dwetε nkaribo tɔn aduasa ason maa no sεnea ɔbεtaa n'akyi ama n'ahenni no atim. <sup>20</sup> Menahem nam apoobɔ so gyigye Israel asikafo no mu biara nkyen dwetε a εkari gram ahannum aduoson (570) de maa Asiriahene. Eno nti, Asiriahene ankɔtow anhyε Israel so, na wantena asase no so nso.

<sup>21</sup> Na Menahem adedi ho nsɛm nkae ne dwuma a odii nyinaa, wɔankyerew angu Israel Ahemfo Abakɔsem Nhoma no mu ana? <sup>22</sup> Bere a Menahem wui no, ne babarima Pekahia na odii n'ade se ɔhene.

### *Pekahia Di Israelhene*

<sup>23</sup> Menahem babarima Pekahia fii ase dii Israelhene wɔ Yudahene Usia ahenni ne mfe aduonum so. Odii hene wɔ Samaria mfe abien.

<sup>24</sup> Nanso Pekahia yεε bɔne wɔ AWURADE ani so. Wantwe ne ho amfi ahonisom a Nebat babarima Yeroboam dii Israelfo anim ma wɔsom no ho.

<sup>25</sup> Na Remalia babarima Peka a na ɔyε Pekahia asraafo so sahene no bɔɔ pɔw tiaa no. ɔfaa mmaprima aduonum fii Gilead, kaa ne ho, kokum

---

<sup>‡</sup> **15:19** Pul yε Babilonia din a wɔde too Asiriahene Tiglat-Pileser III a odii ade 745–727 ansa na wɔrewo Kristo no (AWK) (hwe 1 Be 5.26).

ɔhene no ne Argob ne Arie wɔ Samaria ahemfi abangua mu. Peka na afei obedii hene wɔ Israel.

<sup>26</sup> Pekahia ahenni ho nsem nkae ne dwuma a odii nyinaa, wɔankyerew angu Israel Ahemfo Abakɔsem Nhoma no mu ana?

### *Peka Di Israelhene*

<sup>27</sup> Remalia babarima Peka bedii hene wɔ Israel wɔ bere a na Usia adi hene wɔ Yuda mfe aduonum abien. Odii ade wɔ Samaria mfirihyia aduonu. <sup>28</sup> Nanso Peka yee bɔne wɔ AWURADE ani so. Wantwe ne ho amfi ahonisom a Nebat babarima Yeroboam dii Israel anim ma wɔsom no ho.

<sup>29</sup> Peka ahenni so no, Asiriahene Tiglat-Pilesesr kotoaa Israelfo bio, faa nkuow Iyon ne Abel-Bet-Maaka ne Yanoa ne Kedes ne Hasor ne Gilead ne Galilea ne Naftali nsase nyinaa. Na ɔfaa nnipa no nnommum kɔɔ Asiria. <sup>30</sup> Na Ela babarima Hosea bɔɔ pɔw, tiaa Peka na okum no. Ofii ase dii Israel so hene bere a na Usia babarima Yotam nso adi ade mfe aduonu wɔ Yuda. <sup>31</sup> Peka adedi mu nsem nkae ne dwuma a odii nyinaa, wɔankyerew angu Israel Ahemfo Abakɔsem Nhoma no mu ana?

### *Yotam Yudahene*

<sup>32</sup> Usia babarima Yotam dii hene wɔ Yuda bere a na ɔhene Peka adi ade wɔ Israel mfirihyia abien. <sup>33</sup> Odii ade no, na wadi mfirihyia aduonu anum, na odii Yerusalem so hene mfe dunsia. Na ne na a ɔye Sadok babea no din de Yerusa. <sup>34</sup> Yotam yee nea eṣo AWURADE ani, senea n'agya Usia yee no ara pe. <sup>35</sup> Nanso wansee abosonnan a na nnipa kɔbɔ afɔre, kɔhyew nnuhuam wɔ hɔ

no. ɔno ne obi a ɔsan sii AWURADE Asɔredan no atifi pon.

<sup>36</sup> Yotam ahenni ho nsem nkae ne nea ɔyεe nyinaa, wɔankyerew angu Yuda Ahemfo Abakɔsem Nhoma no mu ana? <sup>37</sup> Saa mmere no mu, AWURADE fii ase somaa Aramhene Resin ne Israelhene Peka, se wɔnkɔtow nhye Yuda so. <sup>38</sup> Bere a Yotam wui no, wosiee no wɔ ne mpamilyimfo nkyɛn wɔ Dawid kurow mu. Na ne babarima Ahas bedii n'ade se ɔhene.

## 16

### *Ahas Di Yudahene*

<sup>1</sup> Bere a ɔhene Peka adi hene wɔ Israel mfe dunson no, na Yotam babarima Ahas\* nso bedii ade wɔ Yuda. <sup>2</sup> Ahas dii hene no, na wadi mfirihyia aduonu. Na odii Yerusalem nso so hene mfirihyia dunsia. Wanyɛ nea ɛsɔ AWURADE, ne Nyankopɔn ani, senea ne panyin Dawid yee no. <sup>3</sup> Mmom, ɔhwɛs Israel ahemfo nhweso so, na mpo ɔde ɔno ankasa ne babarima bɔɔ afɔre wɔ ogya mu. Osuasuaa abosonsom aman no nneyɛ a εyε akyiwade ma AWURADE a εno nti ɔpam wɔn fii Israelfo anim no. <sup>4</sup> ɔbɔɔ afɔre, hyew nnuhuam wɔ abosomfi, mmerɔw so ne dua frɔmfrɔm biara ase.

<sup>5</sup> Afei, Aramhene Resin ne Israelhene Peka tuu sa wɔ Ahas so. Wɔkɔtoaa Yerusalem, nanso wɔanni so nkɔnim. <sup>6</sup> Saa bere no, Edomhene gyee Elat kurow maa Edom. ɔpam Yudafo, na ɔmaa Edomfo no kɔtenaa hɔ, senea εte nnɛ yi.

---

\* **16:1** Ahas ne n'agya Yotam dii hene afe 734 ansa na wɔrewo Kristo (AWK) mu.

<sup>7</sup> Ɔhene Ahas somaa abɔfo kɔɔ Asiriahene Tiglat-Pileser nkyɛn, de nkra kɔmaa no se, “Meyɛ wo somfo ne wo ba. Bra na begye me fi Aram ne Israel asraafo a wɔaka me ahye no nsam.”

<sup>8</sup> Na Ahas faa dwetɛ ne sikakɔkɔɔ fii AWURADE Asɔredan mu hɔ, faa ahemfi hɔ sika de kyɛɛ Asiriahene no. <sup>9</sup> Enti Asiriafo no kɔtoaa Aramfo no wɔ wɔn kuropɔn Damasko mu, kyekyeree εhɔfo no nnommum, de wɔn kɔ kɔtenaa Kir. Wokum ɔhene Resin.

<sup>10</sup> Ɔhene Ahas kɔɔ Damasko, kohyiaa Asiriahene Tiglat-Pileser. Bere a ɔwɔ hɔ no, ohuu afɔremuka sononko bi. Enti ɔde saa afɔremuka no seso ho mfoní, kɔmaa ɔsɔfo Uria. <sup>11</sup> Uria nam ɔhene no asɛm so yɛɛ saa afɔremuka no bi pεrεεpε, na bere a ofi Damasko bae no, na wɔayɛ awie. <sup>12</sup> Ɔhene no fi Damasko bae no, ɔhwɛɛ afɔremuka no ho hyiae, bɔɔ so afɔre. <sup>13</sup> Ɔhene no bɔɔ ɔhyew afɔre ne atoko afɔre, hwiee nsa afɔre guu so, na ɔpetee asomdwoe afɔre ho mogya guu so. <sup>14</sup> Na ɔhene Ahas yii kɔbere mfrafrae afɔremuka a na esi ɔkwān no ano ne afɔremuka foforo yi ntam no fii AWURADE Asɔredan no anim, de kosii afɔremuka foforo no atifi fam.

<sup>15</sup> Ɔka kyereɛɛ ɔsɔfo Uria se, “Bɔ anɔpa afɔre nyinaa a εyɛ ɔhyew afɔre no, anwummere atoko afɔre no, ɔhene ɔhyew afɔre ne atoko afɔre ne nnipa no nyinaa afɔre a wɔn nsa afɔre ka ho wɔ so. Mogya a efi ɔhyew afɔre no nyinaa mu no, wɔmfa mpete afɔremuka foforo no so. Me nko ara na mede kɔbere mfrafrae afɔremuka dedaw no bedi dwuma.” <sup>16</sup> Na ɔsɔfo Uria yɛɛ nea ɔhene Ahas ka kyereɛɛ no se ɔnyɛ no pεrεεpε.

<sup>17</sup> Na afei, ɔhene no tutuu afasu no nkataanim

nnua ne nsuhina nso fi nsu teaseenam no so. Afei oyii Po no fii kɔbere mfrafrae anantwi no akyi de sii abo nsemee no so. <sup>18</sup> Na nidi a ɔde ma Asiriahene no nti, oyii kyinii bi a na wɔayɛ wɔ ahemfi no mu a na wɔde di dwuma homeda no ne ɔhene no abɔntenkwan a ɛkɔ AWURADE Asɔredan mu no fii hɔ.

<sup>19</sup> Ahas ahenni ho nsem nkae no ne dwuma ahorow a odii no, wɔankyerɛw angu Yuda Ahemfo Abakɔsem Nhoma no mu ana? <sup>20</sup> Bere a Ahas wui no, wosiee no ne mpanyimfo nkyen wɔ Dawid kurow mu. Na ne babarima Hesekia bedii n'ade se ɔhene.

## 17

### *Hosea Di Israelhene*

<sup>1</sup> Ela babarima Hosea fii ase dii hene wɔ Israel no, na ɔhene Ahas nso adi hene wɔ Yuda mfirihiya dumien. Odii hene wɔ Samaria mfe akron. <sup>2</sup> ɔyɛɛ bɔne wɔ AWURADE ani so, nanso na ne bɔne no osoɔcɔn se Israel ahemfo a wodii ade ansa na ɔrebidi ade no.

<sup>3</sup> Asiriahene Salmaneser kɔɔ ɔhene Hosea so, kodii ne so nkonom nti, ɔhyɛɛ Israel ma wotuaa sonkahiri a emu ye duru maa Asiria. <sup>4</sup> Afei, ɔhene Hosea bisaa mmoa fii Misraimhene a wɔfre no So nkyen se ɔmmoa no na ɔntew ne ho mfi Asiriahene tumi ase. ɔbɔɔ pɔw tiaa Asiriahene. Bere a Asiriahene huu pɔw bɔne a wabɔ no, ɔkyeree no de no too afiase wɔ n'atuatew ho.

<sup>5</sup> Na Asiriahene ko faa asasetam no nyinaa, na otuaa Samaria ano mfe abiesa. <sup>6</sup> Akyiri no, ɔhene Hosea ahenni mfe akron mu no, Samaria hwee ase, ma wotwaa Israelfo asu kɔɔ Asiria. Wɔbɔɔ

wɔn atenase wɔ Halah nkurow wɔ asu Habor a  
εwɔ Gosan a εfra Media nkuropɔn no mu no so.

### *Asiria Di Samaria So*

<sup>7</sup> Saa amanehunu yi baa Israelman so, efise nnipa no som anyame afoforo, yee bɔne tia AWURADE, wɔn Nyankopɔn a oyii wɔn fii wɔn nkoasom mu wɔ Misraim no. <sup>8</sup> Wosuasuaa abosonsom aman nneyee a enti AWURADE pam wɔn fii asase a εda wɔn anim no so, ne ɔsom a Israel ahemfo de aba no. <sup>9</sup> Na Israelfo no nso nam sum ase, aye nneema pii a na εnsɔ AWURADE wɔn Nyankopɔn ani. Wosisii abosonnan maa wɔn ho wɔ wɔn nkurow nyinaa so, efi wɔn nkurow akese a wɔatwa afasu afa ho, kosi nku-raa. <sup>10</sup> Wosisii afadum kronkron ne Asera nnua wɔ koko biara so ne dua biara a εyε frɔmfrɔm ase. <sup>11</sup> Wɔhyew nnuhuam wɔ nsore so hɔ, te senea aman a AWURADE apam wɔn afi asase a εda wɔn anim no so no yee pε. Enti Israelfo yee bɔne bebree hyee AWURADE abufuw. <sup>12</sup> Yiw, AWURADE kɔkɔbɔ pɔtee ne ne ntimu no nyinaa akyi no, wɔsɔm ahoni. <sup>13</sup> AWURADE somaa n'adiyifo ne adehufo ntoatoaso ma wɔkɔbɔɔ Israel ne Yuda kɔkɔ se, "Monnan mfi mo akwammɔne nyinaa ho. Monyε osetie mma m'ahyede ne me mmara, nea mehyee mo agyanom se wonni so no nyinaa, nea menam m'asomfo adiyifo no so de maa mo no."

<sup>14</sup> Nanso Israelfo no antie. Na wɔyεε asoɔden se wɔn agyanom, na wɔannye AWURADE, wɔn Nyankopɔn, anni. <sup>15</sup> Wɔroo ne mmara ne n'apam a ɔne wɔn agyanom yee no. Na wɔamfa ne kɔkɔbɔ no anyε hwee. Wɔsɔm

abosomhuhuw, maa wɔdan nnipa teta. Wɔhwɛɛ aman a atwa wɔn ho ahyia no nhweso so, nam so yɛɛ asoden maa AWURADE mmara nsem a ɔhyɛɛ sɛ wonnsuasua wɔn no.

<sup>16</sup> Wɔantie AWURADE, wɔn Nyankopɔn mmara nsem no nyinaa na wɔyɛɛ nantwimma abien ahoni a wɔagu. Wosii Asera dua, som Baal ne wim atumfo nyinaa. <sup>17</sup> Na mpo, wɔde wɔn ankasa mmabarima ne wɔn mmabea bɔɔ afore wɔ ogya mu. Wɔkɔɔ abisa, wɔyɛɛ abayisem, nam so tɔn wɔn ho maa bɔne, de hyɛɛ AWURADE abufuw.

<sup>18</sup> Na esiane se AWURADE bo fuw nti, ɔpereaa wɔn fii n'anim. Yuda abusuakuw\* nko ara na ekaa wɔn wɔ asase no so. <sup>19</sup> Na mpo, nnipa a cɔwɔ Yuda anni AWURADE, wɔn Nyankopɔn, ahyɛde so. Wɔfaa ɔkwan bɔne a Israel faa so no so. <sup>20</sup> Eno nti, AWURADE poo Israel asefo nyinaa. ɔde wɔn maa wɔn atamfo, nam so twee wɔn aso, kosii se wɔssee wɔn.

<sup>21</sup> Na bere a AWURADE tew Israel fii Dawid ahemman ho no, wɔfaa Nebat babarima Yeroboam, de no dii wɔn so hene. Na Yeroboam maa Israelfo gyaee AWURADE akyidi, ma wɔyɛɛ bɔne kesɛ. <sup>22</sup> Na Israelfo no kɔɔ so nantew Yeroboam akwammɔne no so. Wɔannyae ahonisom ho bɔneyɛ no, <sup>23</sup> kosii se ne korakora no, AWURADE pepaa wɔn fii hɔ, sɛnea n'adiyifo hyɛɛ ho nkɔm se εbεba no. Enti wotwaa Israel asu kɔɔ Asiria asase so baabi a wɔte besi nne yi.

### *Amamfrafo Kotena Israel*

---

\* **17:18** Anafo Ahemman no nso yɛ Simeon ne Benyamin asefo nanso Yuda nko ara ne abusuakuw a na wodi no nokware (hwe 1 Ah 11.31-32).

<sup>24</sup> Na Asiriahene twee nnipa akuwakuw fii Babilonia, Kuta ne Awa, Hamat ne Sefarwaim, de wɔn beduaa Samaria nkurow so, ma wosii Israelfo anan mu. Enti Asiriafo no faa Samaria ne Israel nkurow a ekeka ho no. <sup>25</sup> Nanso esiane se saa ahɔho atutenafo yi ansom AWURADE bere a woduu hɔ ara pε no nti, AWURADE maa gyata kɔc wɔn mu, kokunkum wɔn mu bi. <sup>26</sup> Enti wɔde nkra kɔmaa Asiriahene se, “Nnipa a woabɔ wɔn atenase wɔ Israel nkurow so no nnim senea wɔsɔm asase no so Nyankopɔn. Wasoma gyata aki wɔn mu akɔsɛe wɔn, efise wɔansom no anisɔ mu.”

<sup>27</sup> Na Asiriahene nso hyee se, “Soma asɔfo a wɔatwa wɔn asu no mu baako fi Samaria, na ɔnsan nkɔ Israel. Ma ɔnkyerɛ ahɔho no kwan a wɔfa so som asase no so Nyankopɔn.” <sup>28</sup> Enti asɔfo a wɔatwa wɔn asu afi Samaria no mu baako san kɔc Bet-El, kɔnkyerɛ ahɔho no ɔkwan a wɔfa so som AWURADE.

<sup>29</sup> Nanso saa ahɔho akuwakuw ahorow yi kɔc so som wɔn ankasa anyame. Kurow biara a wɔtete mu no, wɔde wɔn ahoni kosisii abosonnan a Israelfo no asisi no mu. <sup>30</sup> Wɔn a wɔfi Babilonia no som wɔn nyame Sukot-Benot ahoni. Wɔn a wɔfi Kuta som wɔn nyame Nergal. Na wɔn a wɔfi Hamat som Asima. <sup>31</sup> Awifo som wɔn anyame Nibhas ne Tartak. Na mpo, nnipa a wɔfi Sefarwaim hyew wɔn ankasa mma se afɔrebɔde, de maa Adramelek ne Anamelek. <sup>32</sup> Saa ahɔho yi som AWURADE de, nanso woyii asɔfo bi fii wɔn mu a, na cɔbɔwɔsɔm AWURADE de, nanso wɔcɔka so faa amanne kwan a wɔn aman a wɔfi so no fa so som no so.

<sup>34</sup> Na eyi da so kɔ so wɔ wɔn mu de besi nne. Na wɔda so ye kan nnebɔne no a anka εε se wɔsom AWURADE, di ne mmara, ne nkyerɛkyere ne ahyɛde a ɔde maa Yakob a ɔsesaa ne din ma εbεyεε Israel asefo no so. <sup>35</sup> Nanso na AWURADE ne Yakob asefo ayε apam, ahyε wɔn se, "Monnsom anyame foforo, monnkotow wɔn, na monnsom wɔn, na mommmɔ afɔre mma wɔn. <sup>36</sup> AWURADE a ɔnam nsenkyerɛnne akese ne tumi so yii mo fii Misraim no nko ara na monsom no. ɔno nko ara na εε se mosom no, na mokotow no, na mobɔ afɔre ma no. <sup>37</sup> Monhwε yiye, na munni mmara, nkyerɛkyere ne ahyɛde a ɔkyerɛw maa mo no so. Εnse se mosom anyame foforo biara. <sup>38</sup> Mommma mo were mmfi apam a me ne mo yee no, na monnsom anyame foforo biara. <sup>39</sup> Monsom AWURADE, mo Nyankopɔn nko ara. ɔno na obegye mo afi mo atamfo nyinaa nsam."

<sup>40</sup> Nanso nnipa no antie, kɔɔ so faa wɔn akwan dedaw no so. <sup>41</sup> Enti bere a ahɔho yi resom AWURADE no, bere koro no ara mu, na wɔresom wɔn ahoni. Na ebisi nne, wɔn asefo ye ade koro no ara.

## 18

### *Hesekia Di Yudahene*

<sup>1</sup> Ahas babarima Hesekia fii ase dii hene wɔ Yuda no, na Ela babarima Hosea adi hene wɔ Israel mfe abiɛsa. <sup>2</sup> Odii hene no na wadi mfirihyia aduonu anum, na odii hene wɔ Yerusalem mfirihyia aduonu akron. Na ne na ye Sakaria babea a wɔfrε no Abi. <sup>3</sup> Οyεε nea εε AWURADE ani, senea n'agya Dawid yee pεrεεεrε.

<sup>4</sup> Otutuu abosonnan, bubuu afadum kronkron no, kaa Asera nnua no guu fam. Obubuu kɔbere mfrafrae ɔwɔ a Mose aye no, efise na nnipa no hyew nnuhuam ma no de som. Na wɔfrɛ ɔwɔ no a wɔde kɔbere mfrafrae aye no Nehustan.

<sup>5</sup> Hesekia de ne ho too AWURADE, Israel Nyankopɔn so. N'akyi ne n'aním no, na ɔhene biara nni hɔ a ɔte se ɔno wɔ Yuda asase so.

<sup>6</sup> Biribiara mu, odii AWURADE nokware, na ɔde ntoboase dii ahyɛde a AWURADE de maa Mose no nyinaa so. <sup>7</sup> Ne saa nti, na AWURADE ka ne ho, na Hesekia kɔcɔ so wɔ biribiara a ɔyεe mu. ɔyεe dɔm tiaa Asiriahene, na wantua sonkahiri amma no. <sup>8</sup> Afei, okodii Filistifo so nkɔnim, de kosii Gasa ne n'ahye so, fi ne nkuraa, de kosii wɔn kuropɔn a woato ofasu atwa ho no.

<sup>9</sup> Hesekia ahenni no mfe anan so a na ɔhene Hosea nso wɔ n'ahenni wɔ Israel mfe ason mu no, Asiriahene Salmaneser kotuua Israel ano, fi ase kaa Samaria kuropɔn hyεe. <sup>10</sup> Mfe abiessa akyi a, na ɔhene Hesekia adi ade mfe asia a, na εyε ɔhene Hosea nso adedi wɔ Israel mfe akron mu no, Samaria bɔe. <sup>11</sup> Saa bere no, Asiriahene twaa Israelfo no asu kɔcɔ Asiria, de wɔn hyehyε aman so wɔ Halah wɔ Asubɔnten Habor a εwɔ Gosan konkɔn so ne nkurow akεse a εwɔ Media mu. <sup>12</sup> Efise wɔantie AWURADE, wɔn Nyankopɔn no. Wobuu n'apam no so, mmara a AWURADE nam Mose so hyehyε maa wɔn no.

### *Asiria Tu Yuda So Sa*

<sup>13</sup> ɔhene Hesekia adedi mfe dunan so, Asiriahene Sanaherib bɛtow hyεe Yuda nkurow a na wɔabɔ ho ban no so, dii wɔn so nkɔnim. <sup>14</sup> Na Hesekia de saa nkra yi kɔmaa Asiriahene

wɔ Lakis se, "Mayε mfomso. Sε wubefi ha akɔ nko ara de a, sonkahiri biara a wubegye me no, metua." Na Asiriahene bisaa mpata a εborø dwetε tɔn dubaako ne sikakɔkɔɔ nso bεyε tɔn baako. <sup>15</sup> Enti ɔhene Hesekia de dwetε a wɔakora no wɔ AWURADE Asoredan no mu ne nea εwɔ ahemfi adekorae hɔ nyinaa mae. <sup>16</sup> Mpo, Hesekia waawae sikakɔkɔɔ a wode aduradura asoredan no apon ho, de ne nyinaa maa Asiriahene.

<sup>17</sup> Eyinom nyinaa akyi no, Asiriahene somaa ne sahene, n'asraafodɔmhene ne n'anamusini fii Lakis ne asraafodɔm a wɔn mu ye duru, kɔɔ Hesekia\* so wɔ Yerusalem. Asiriafo no gyinnaa nsukwan bi a εma atifi ɔtare nsu a εben ɔkwan a εde kɔ faako a wɔpa ntama ani no ho. <sup>18</sup> Wɔfrεε Hesekia, nanso ɔsomaan ne mpanyimfo yi se wonkohyia wɔn: Hilkia babarima Eliakim a ɔhwε ahemfi hɔ so, ɔkyerewfo Sebna ne Asaf babarima Yoa a oyε ahemfi abakɔsɛm kyerewfo.

### *Senaherib Hunahuna Yerusalem*

<sup>19</sup> Na ɔsahene no ka kyerεε wɔn se, "Monka nkyere Hesekia se,

"Asem a otumfo, Asiriahene ka ni: Dεn na wode wo ho to so a εma wugye wo ho di saa? <sup>20</sup> Woka se wowɔ akodi ho nyansa ne n'ahooden, nanso woka nsem hunu. Hena na ɔtaa w'akyi a enti wotew m'anim atua? <sup>21</sup> Hwε w'ani da Misraim so, demmire a emu abu a εte sε pema a wutweri a εbeωω wo nsa mu apira wo no! Saa na Misraimhene Farao te ma wɔn a wɔde wɔn ho to ne so

---

\* **18:17** Nsuka a εnam asase ase a Hesekia tui no ma wonyaa nsu fii Asubɔnten Gihon mu.

no nyinaa. <sup>22</sup> Ebia wobεka se, “Yεde yεn ho to AWURADE, yεn Nyankopɔn so!” Enyε ɔno na ɔhene Hesekia atutu n’abosonnan ne afɔremuka nyinaa, ahyε Yudafo se wɔnsom wɔ afɔremuka a εwɔ Yerusalem ha nko ara so no?

<sup>23</sup> “Meka asem bi akyere wo! Me wura Asiriahene ne wo bεye nhyeheyε bi. Se wubenya aponkɔsotefo mpenu, afi wo asraafo mu a, ɔbεma wɔn aponkɔ mpenu ama wɔatenatena wɔn so. <sup>24</sup> Na w’asraafo ketewa sεε yi, εbεye dεn na woaso dae, se wubetumi ne me wura asraafo no mu fa bi a wɔye mmerew no mpo adi asi. Minim se wode wo ho ato Misraim nteaseenam ne aponkɔsotefo mmoa so. <sup>25</sup> Bio, wugye di se, maba se merebetow ahyε asase yi so asee no kwa a AWURADE nsa nni mu? AWURADE ankasa ka kyereε me se menkɔko ntia saa asase yi na mensεe no.”

<sup>26</sup> Afei, Hilkia babarima Eliakim ne Sebna ne Yoa ka kyereε ɔhene no ananmusini no se, “Kasa wɔ Arameike mu kyere yεn, na saa kasa no na yεte ase yiye. Nka Hebri nkyere yεn, efise nnipa a wɔwɔ fasu no so no bεte.”

<sup>27</sup> Na Senaherib nanmusini no buae se, “Me wura pε se obiara a εwɔ Yerusalem te saa asem yi, na εnyε mo nko. ɔpε se wɔtε se, se moamma mo nsa so a, wobetua kuropɔn yi. ɔkɔm ne osukɔm werεmfo bεde nkurofo no ara kosi se, wobedi wɔn ara agyanan, anom wɔn dwonsɔ.”

<sup>28</sup> Afei, ɔɔre gyinae, maa ne nne so kasaa wɔ Hebri mu, kyereε nnipa a wɔwɔ ɔfasu no so se, “Muntie nkra a efi Asiria ɔhene kεse no nkyεn!

<sup>29</sup> Sεnea ɔhene se ni: Mommma ɔhene Hesekia

nnaadaa mo. Ḍrentumi nnye mo mfi me tumi ase. <sup>30</sup> Mommma Hesekia mfa saa asem a ɔkae se, 'AWURADE begye yen! Woremfa saa kurow yi mma Asiriahene' no mma mo tirim nye mo dɛ.

<sup>31</sup> "Munntie Hesekia. Nea Asiriahene ka ni: Mo ne me nyɛ asomdwoe nhyehyɛe na mommra me nkyɛn. Na afei, mɛma mo mu biara adi ɔno ankasa bobe ne borɔdɔma na woanom nsu afi ɔno ankasa abura mu. <sup>32</sup> Na meyɛ nhyehyɛe de mo akɔ asase foforo bi a ete sɛ eyi so. Eyɛ ɔman a atoko, nsa, brodo, bobe nturo, ngonnua ne ewo abu so hɔ. Eyɛ asase a nneɛma pa abu so hɔ. Mompere nkwa, na munyi owu akwa!"

"Mommma Hesekia nnaadaa mo nka se, 'Awurade begye yen!' <sup>33</sup> Anyame a wɔwɔ aman so no atumi agye wɔn nkurofo afi Asiriahene nsam da? <sup>34</sup> Asem bɛn na etoo Hamat ne Arpad anyame no? Na Sefarwaim, Hena ne Iwa anyame nso, wɔwɔ he? Wotumi gyee Samaria fii me tumi ase ana? <sup>35</sup> ɔman bɛn so anyame na watumi agye ne nkurofo afi me tumi ase? Mommɔ baako pɛ din. Na afei, dɛn na ɛma mo dwene sɛ AWURADE betumi agye Yerusalem?"

<sup>36</sup> Na nnipa no yɛɛ komm a wɔamma mmuae biara, efisɛ na Hesekia aka akyerɛ wɔn se wɔnnkasa.

<sup>37</sup> Afei Hilkia babarima Eliakim a na ɔhwɛ ahemfi no ntotoe so, Sebna a na ɔyɛ ɔkyerewfo ne Asaf babarima Yoa a ɔno nso yɛ ɔkyerewfo kɔɔ Hesekia nkyɛn a wɔasunsuane wɔn ntade mu, kɔkaa nea ɔsahene no aka akyerɛ no no.

## 19

### *Hesekia Hwehwe AWURADE Mmoa*

<sup>1</sup> Bere a ɔhene Hesekia tee eyinom no, osunsuan ne ntade mu, na ofuraa atweaatam, na ɔkɔɔ AWURADE asɔredan mu. <sup>2</sup> Na ɔsoma Eliakim a ɔhwe ahemfi ntotoe so, Sebna, a ɔye ɔkyerewfo ne asɔfo akunini a wɔn nyinaa furafura atweaatam, kɔɔ Amos babarima Odiyifo Yesaia nkyen. <sup>3</sup> Wɔka kyereε no se, “Senea ɔhene Hesekia ka ni: Saa da yi ye ɔhaw, animka ne animguase da. Aye te se nea mmofra awo du so, na ahooðen a wɔde bɛwo wɔn nni hɔ. <sup>4</sup> Nanso ebia AWURADE, mo Nyankopɔn ate se Asiria nanmusini no regu Onyankopɔn teasefo no anim ase, na wɔbɛtwe n'aso wɔ ne nsenkeka no ho. Enti bɔ mpae ma yen a yɛaka no!”

<sup>5</sup> Na ɔhene Hesekia mpanyimfo no kɔkaa ɔhene nkra no kyereε Yesaia, <sup>6</sup> na Yesaia buae se, “Ka kyere wo wura se, ‘Senea AWURADE se ni: Mma abususem a Asiriahene asomafo no ka tiaa me no nhaw wo. <sup>7</sup> Muntie! Mede honhom bi rebɛhye ne mu, senea εbεyε a se ote asem bi a ɔbesan akɔ ne man mu na hɔ na mɛma wɔde afoa akum no.’”

<sup>8</sup> Bere a ɔsaħene no tee se Asiriahene afi Lakis no, ɔsan n'akyi kohuu se ɔhene no ne Libna reko.

<sup>9</sup> Ankyε, ɔhene Sanaherib nyaa nkra se, Etiopiaħene Tirhaka adi asraafo anim, rebɛko atia no. Na ansa na ɔbesan akohyia asraafo no, ɔde saa nkra yi maa se wɔmfha nkɔma Hesekia wɔ Yerusalem. <sup>10</sup> “Monka nkyere Yudahene Hesekia se: Mma onyame a wode wo ho ato no so no nnaadaa mo nka se, ‘Wɔremfa Yerusalem mma Asiriahene.’ <sup>11</sup> Moate nea Asiria ahemfo aye

amanaman no nyinaa. Wɔasɛe wɔn pasaa. Na mo de, wobegye mo ana? <sup>12</sup> Anyame a wɔwɔ aman a me nenanom sɛee wɔn no, aman te sɛ, Gosan, Haran, Resef ne Edenfo a na wɔwɔ Telasar no anyame gyee wɔn ana? <sup>13</sup> Nsem bɛn na εtotoo Hamathene ne Arpadhene? Nsem bɛn nso na εtotoo Sefarwaim, Hena ne Iwa ahemfo?"

<sup>14</sup> Hesekia nsa kaa krataa a abɔfo no de bae no, ɔkenkanee. Afei ɔforo kɔɔ AWURADE asɔredan no mu kɔtrew mu wɔ AWURADE anim. <sup>15</sup> Na Hesekia bɔɔ mpaε kyereɛ AWURADE se, "Asafo AWURADE, Israel Nyankopɔn a wɔasi wo hene wɔ Kerubim ntam. Wo nko ara na woyɛ Onyankopɔn wɔ asase so ahenni nyinaa so. Wo na wobɔɔ ɔsoro ne asase. <sup>16</sup> Brɛ w'aso ase, AWURADE, na tie! Bue w'ani, AWURADE, na hwɛ. Tie nsem a Sanaherib asoma de abɛsopa Onyankopɔn teasefo no.

<sup>17</sup> "AWURADE, εyε nokware sɛ Asiria ahemfo asɛe aman yi nyinaa, senea nkra no ka no. <sup>18</sup> Na wɔatow anyame a wɔwɔ saa aman yi so no agu gya mu, ahyew wɔn, efise wɔnyɛ anyame, na mmom wɔyɛ nnua ne abo a nnipa de wɔn nsa aye. <sup>19</sup> Afei, AWURADE, yɛn Nyankopɔn, gye yɛn fi ne tumi ase, na εbɛma ahenni a εwɔ asase so nyinaa ahu sɛ wo nko ara, AWURADE, na woyɛ Onyankopɔn."

### *Yesaia Hyε Yuda Gye Ho Nkɔm*

<sup>20</sup> Na Amos babarima Yesaia de saa nkra yi kɔmaa Hesekia se, "Sɛɛ na AWURADE, Israel Nyankopɔn se: Esiane sɛ woabɔ me mpaε afa Asiriahene Sanaherib ho nti, <sup>21</sup> eyi ne asem a AWURADE aka atia no:

"'ɔbabeabun Sion sopa wo,

na ḡserew wo.

Obabea Yerusalem di wo ho few,  
na ḡwosow ne ti bere a woreguan.

**22** Hena na wugye di sε woyeyaw no, di ne ho  
few nso?  
Hena na womaa wo nne so tiaa no  
na wohwεε no ahantan so?  
Eyε Israel ḡkronkronni no!

**23** Wonam w'asomafo so  
adi AWURADE ho few.  
Na woaka se,  
“Me nteaseεnam dodow nti  
maforo mmepɔw atenten.

Yiw Lebanon mmepɔw a εwoware pa ara no.

Matwitwa ne sida dua atenten no,  
ne n'apepaw a εyε fe no agu fam.  
Madu ne mmepɔw a εwɔ akyirikyiri no so,  
ne ne kwaebarentuw mu.

**24** Matutu mmura wɔ ahɔho nsase bebree so  
de ne nsu pa no adwudwo me ho.  
Mpo, mepaee Misraim nsubɔnten mu  
senea m'akofo betumi atwa!”

**25** “ ‘Na Montee ε?  
Bere tenten a atwam, na mehyε too ho.  
Bere bi a atwam no na medwenee ho;  
afei mama aba mu sε,  
moadan ḡman a mosεe nkuron a wɔabɔ  
ho ban.

**26** Wɔn nkurɔfo a tumi afi wɔn nsa no  
ho adwiriw wɔn, na animguase aka wɔn.  
Wɔte sε afuw so nnua,  
ne afifide foforo a εyε mmrew.  
Wɔte sε sare a efifi ḡdan atifi  
a εhyew ansa na anyin.

- 27 “'Nanso minim nea wote  
     bere a woba ne bere a woko  
     ne senea wo bo huru tia me.
- 28 Na esiane se wo bo huru tia me  
     na w'ahantan adu m'asom nti,  
     mede me darewa bεhyε wo hwenem,  
     na mede akwankyerε dade ahyε w'anom,  
     mεma wo afa ɔkwan a wofaa so bae no so  
     asan w'akyi.'
- 29 "Eyi na εbεyε nsenkyerεnne ama wo, Hes-  
     ekia:  
     "Saa afe yi wubedi nea εno ankasa fifii.  
     Afe a εto so abien no, wubedi nea efi mu ba.  
     Nanso afe a εto so abiesa no de, wo ara dua na  
         twa,  
         yε bobe nturo na di so aba.
- 30 Bio, nkae bi a ofi Yuda fi  
     begye ntin wɔ fam na wasow aba wɔ soro.
- 31 Na nkae bi befi Yerusalem aba,  
     na nkae dɔm afi Beρow Sion so.  
     Asafo AWURADE pε mu na eyi bεyε.
- 32 "Eyi ne asem a AWURADE ka fa Asiriahene  
     ho:  
     "ɔrenhyεn saa kuropɔn yi mu  
         na ɔrentow bεmma wɔ ha.  
     ɔremfa nkatabo mmegyina kuropɔn no akyi  
         na ɔrensi pie ntua n'ano.
- 33 ɔhene no kwan a ɔfaa so bae no ara so na  
         ɔbesan afa akɔ n'ankasa man mu.  
     AWURADE ka se,  
         ɔrenwura saa kurow yi mu.
- 34 Esiane m'ankasa m'auonyam ne m'akoa  
     Dawid nti,  
     mεbɔ ho ban."

<sup>35</sup> Saa anadwo no, AWURADE bɔfo kɔɔ Asiria nsraban mu, kokum Asiria asraafo no mpem oha aduwɔtwe anum. Asiriafo a wɔkae no nyan anɔpa no, wohuu sɛ afunu gugu mmɔnten so baabiara. <sup>36</sup> Na Asiriahene Sanaherib gyaeε ɔko no, kɔɔ n'ankasa n'asase so. Ḍkɔtenaa n'ahenkurow Nineve mu.

<sup>37</sup> Da koro bi a ɔresom wɔ ne nyame Nisrok abosonnan mu no, ne mmabarima Adramelek ne Sareser de wɔn afoa kokum no. Woguan fii hɔ kɔtenaa Ararat asase so, na ne babarima foforo Esarhadon bedii n'ade sɛ Asiriahene.

## 20

### *Hesekia Yare Ne N'ayaresa*

<sup>1</sup> Saa nna no mu no, Hesekia yaree owuyare, na Amos babarima Odiyifo Yesaia kɔɔ ne nkyɛn kɔkae se, “Senea AWURADE se ni: Toto w'akwan yiye, efissɛ worebewu; na wo ho renye wo den bio.”

<sup>2</sup> Bere a Hesekia tee asem yi, otwaa n'ani hwɛɛ ofasu, bɔɔ AWURADE mpaε se, <sup>3</sup> “Kae, AWURADE, senea manantew w'anim nokware mu na mede me koma aye nea ɛfata wɔ w'anim.” Na Hesekia suu bebree.

<sup>4</sup> Na ansa na Yesaia befi adiwo no mfimfini no, AWURADE de asem yi besii ne so se, <sup>5</sup> “San kɔ Hesekia a ɔye me nkurofo kannifo no nkyɛn, na kɔka kyere no se, ‘Sεε na AWURADE a ɔye w'agya Dawid Nyankopɔn se: Mate wo mpaebɔ no, ahu wo nusu no. Mesa wo yare, na nnansa akyi no, wobɛsɔre afi mpa so, na woakɔ AWURADE Asɔredan mu. <sup>6</sup> Mede mfe dunum beka wo mfe ho, na megye wo ne saa kuropɔn yi afi

Asiriahene nsam. Me somfo Dawid nti, mεyε eyi de agye m'antuonyam.' "

<sup>7</sup> Na Yesaia ka kyereε Hesekia asomfo no se, "Momfa borɔdɔma nyε ngo, na momfa nsrasra pɔmpɔ no so." Wɔyεε saa, na Hesekia nyaa ahoođen.

<sup>8</sup> Ansa na ɔrebanya ayaresa no, Hesekia bisaa Yesaia se, "Nsenkyerenno bɛn na AWURADE bεyε, de akyere se ɔbεsa me yare, na matumi akɔ AWURADE Asɔredan mu nnansa so?"

<sup>9</sup> Yesaia buae se, "Eyi ne nsenkyerenno a AWURADE bεyε akyere wo se obedi ne bɔhyε so. Wope se sunsuma no kɔ n'anim anammɔntu du anaa εsan n'akyi anammɔntu du?"

<sup>10</sup> Hesekia buae se, "Honhom no kɔ n'anim bere biara. Na mmom, ma εnkɔ n'akyi."

<sup>11</sup> Enti Yesaia sreeε AWURADE se ɔnyε eyi, na ɔmaa sunsuma no tetew san n'akyi anammɔntu du wɔ Ahas atrapoe no so.

### *Babilonia Ananmusifo*

<sup>12</sup> Saa bere yi mu na Babiloniahene Baladan babarima Merodak-Baladan\* soma ma wɔkɔmaa Hesekia tirinkwa ne akyede, efise na wate se ɔyare dennen bi bɔɔ Hesekia. <sup>13</sup> Hesekia gyee Babilonia ananmusifo yi, kyereε wɔn biribiara a ɔwɔ wɔ n'adekoradan mu a εyε dwete, sikakɔkɔ, nnuhuam ne ngo a εyε huam. Afei nso, ɔde wɔn kɔ n'adekorabea, san kyereε wɔn n'adekoradan mu biribiara. Biribiara nni n'ahemfi hɔ anaa n'aheman mu hɔ a Hesekia ankyere wɔn.

---

\* **20:12** Wɔde Merodak too Marduk a εyε Babilonia nyame no.

**14** Afei Odiyifo Yesaia kɔɔ ɔhene Hesekia nkyen, kobisaa no se, "Asɛm bɛn na saa mmaprima no kae na he na wofi bae?"

Hesekia buae se, "Wofi akyirikyiri asase bi so. Wofi Babilonia, na wɔbaa me nkyen."

**15** Odiyifo no bisae se, "Dɛn na wohuu wɔ w'ahemfi hɔ?"

Hesekia buae se, "Wohuu biribiara a ɛwɔ m'ahemfi ha. Biribiara nni m'ademude mu a mamfa ankyere wɔn."

**16** Na Yesaia ka kyereɛ Hesekia se, "Tie saa asɛm a efi AWURADE nkyen yi: **17** Nokware, bere bi bɛba a, wɔbesoa biribiara a ɛwɔ w'ahemfi ne agyapade a w'agyanom akora de abedu nne no aks Babilonia. Biribiara renka, sɛɛ na AWURADE se. **18** W'ankasa w'asefo bi mpo, wɔbɛfa wɔn nnommum. Wɔbeɛye piamfo a wɔbesom wɔ Babiloniahene ahemfi."

**19** Na Hesekia ka kyereɛ Yesaia se, "Saa asɛm yi a efi AWURADE nkyen a woaka akyere me yi ye asɛm papa." Nanso na ɔhene no redwene sɛ, ne bere so de, obenya asomdwoe ne bammo.

**20** Nsɛm a esisii Hesekia ahenni mu ɳkae no a ne tumidi ka ho, ne senea ɔyɛɛ subun, twaa suka<sup>†</sup> maa nsu baa kurow no mu no nyinnaa, wɔankyerew angu Yuda Ahemfo Abakɔsem Nhoma no mu ana? **21** Bere a Hesekia wui no, ne babarima Manase na odii n'ade sɛ ɔhene.

## 21

### *Manase Di Yudahene*

---

<sup>†</sup> **20:20** Hesekia twaa asase ase nsuka fii Asubonten Gihon mu, senea ɛba se bere a wɔatua mo ano bi ba a, wobenya nsu.

<sup>1</sup> Bere a Manase dii hene no, na wadi mfe dumien, na odii hene wɔ Yerusalem mfirihyia aduonum anum. Na ne na din de Hefsibah. <sup>2</sup> Ɔyεε bɔne wɔ AWURADE ani so, suasuaa abosonsomfo aman nneyεε a εye akyiwade a AWURADE apam afi asase a εda Israel anim no so no. <sup>3</sup> Ɔsan sisii abosonsomfo abosonnan a n'agya Hesekia bubu gui no. Ɔyεε afɔremuka pii maa Baal, na osii Asera dua, senea Israelhene Ahab yεe ara pε. Afei, ɔkotow sɔree wim atumfo. <sup>4</sup> Na mpo, osisii abosom afɔremuka pii wɔ Awurade asɔredan mu; baabi a AWURADE aka se wɔnhyε ne din anuonyam no. <sup>5</sup> Osisii saa afɔremuka no wɔ AWURADE Asɔredan no adiwo abien hɔ, de maa wim nsoromma no. <sup>6</sup> Na mpo, Manase de ɔno ankasa babarima bɔɔ afɔre wɔ ogya mu. Na ɔye abayisem, kɔ abisa. ɔkɔɔ samanfrefo hɔ ne asumanfo so. Ɔyεε bɔne bebree AWURADE ani so, ma εhyεε no abufuw.

<sup>7</sup> Manase faa Asera dua a wayε no de kosii asɔredan mu, beae koro no ara a AWURADE ka kyereε Dawid ne ne babarima Salomo se, "Wɔbεhyε me din anuonyam wɔ ha daa nyinaa wɔ saa asɔredan yi mu wɔ Yerusalem. Yerusalem yε kurow a mayi afi Israel mmusuakuw a aka no nyinaa mu. <sup>8</sup> Na se Israelfo betie m'ahyεde a menam m'akoa Mose so hyε maa wɔn no a, merentwa wɔn asu mfi asase yi a mede maa wɔn agyanom no so." <sup>9</sup> Nanso nnipa no antie. Manase dii wɔn anim ma wɔyεε bɔne bebree a esen abosonsom aman a AWURADE sεee no bere a Israelfo kɔɔ saa asase no so no mpo.

<sup>10</sup> AWURADE nam n'asomfo a wɔyε n'adiyifo

so kae se, <sup>11</sup> "Yudahene Manase ayε akyiwade bebree. Na mpo, ɔyε omumɔyεfo sen Amorifo\* a wɔbεtenaa asase yi so ansa na Israel reba no. Wadi Yudafo anim de wɔn akɔ ahonisom mu. <sup>12</sup> Enti sεε na AWURADE, Israel Nyankopɔn se: Mede ɔshaw ne abεbresε bεto Yerusalem ne Yuda so ama aso a εbεte saa nsem no mu ayε no yonn. <sup>13</sup> Mεfa ɔkwan a menam so buu Samaria ne Ahab abusua atεn no so abu Yerusalem atεn. Mεpepa nnipa a wɔwɔ Yerusalem nyinnaa, te senea obi hohoro asanka mu, na ɔdan butuw no. <sup>14</sup> Na mpo, mεpo me nkurofo kakra a wɔaka no, na mede wɔn bεma wɔn atamfo sε asade. <sup>15</sup> Efisε wɔayε bɔne kεse wɔ m'anim, nam so ahyε me abufuw, fi bere a wɔn agyanom fii Misraim no."

<sup>16</sup> Manase kunkum nnipa a wɔnyεes bɔne nso bebree kosii sε, mogya a edi bem hyεs Yerusalem ma, fi ti kosi ti. Eyi ka bɔne a ɔmaa Yudafo no yε de wɔn kɔɔ bɔne a wɔyεes no AWURADE ani so no ho.

<sup>17</sup> Manase ahenni ho nsem nkae ne dwuma a odii nyinnaa ne bɔne a ɔyεe no, wɔankyerεw angu Yuda Ahemfo Abakɔsem Nhoma no mu ana? <sup>18</sup> Manase wui no, wosiee no wɔ ahemfi no turo a na εyε Usa dea no mu. Na ne babarima Amon na odii n'ade sε ɔhene.

### *Amon Di Ade Wɔ Yuda*

<sup>19</sup> Amon dii hene no, na wadi mfe aduonu abien. Odii hene wɔ Yerusalem mfe abien. Na wɔfrε ne na Mesulemet a na ɔyε Harus a ofi Yolba no babea. <sup>20</sup> ɔyεs bɔne wɔ AWURADE ani

\* **21:11** Din Amorini no yε amansan din ma nnipa a na wɔwɔ Kanaan so ansa na Israelfo redi wɔn so no.

so, senea n'agya Manase yee no ara pe. <sup>21</sup> Ofaa n'agya nhweso so, som ahoni koro no ara a na n'agya som wɔn no. <sup>22</sup> Ogyaw AWURADE, n'agyanom Nyankopɔn no na wampe se ɔbefa AWURADE akwan so.

<sup>23</sup> Na Amon no ankasa asomfo bɔɔ ne ho pow, kum no wɔ n'ahemfi. <sup>24</sup> Na nnipa a wɔwɔ asase no so nyinaa kunkum nnipa a wɔbɔɔ ɔhene Amon ho pɔw no, na wɔde ne babarima Yosia dii ade se ɔhene.

<sup>25</sup> Amon ahenni ho nsem nkae ne dwuma a odii no nyinaa, wɔankyerew angu Yuda Ahemfo Abakɔsem Nhoma no mu ana? <sup>26</sup> Wosiee no wɔ ne boda a ɛwɔ Usa turo mu ho no mu. Na ne babarima Yosia dii ade se ɔhene.

## 22

### *Yosia Di Yudahene*

<sup>1</sup> Bere a Yosia dii hene wɔ Yuda no, na wadi mfirihyia awotwe, na odii ade wɔ Yerusalem mfe aduasa baako. Na ne na din de Yedida a ɔyε Adaia a ofi Boskat no babea. <sup>2</sup> ɔyε nea ɛsɔ AWURADE ani, yεε nea ne tete agya Dawid yεε no bi. Wamfi adetreneeyε ho.

<sup>3</sup> ɔhene Yosia dii mfirihyia dunwɔtwe wɔ n'ahenni mu no, ɔsomaas Asalia babarima Safan, asennii kyerewfo Mesulam nena, kɔɔ AWURADE Asɔredan mu. ɔka kyerεε no se, <sup>4</sup> "Kɔ ɔsɔfopanyin Hilkia nkyεn, na ma ɔnkan sika a aponanohwεfo no agyigye afi nnipa no nkyεn wɔ AWURADE Asɔredan mu no. <sup>5</sup> Fa saa sika yi hyε nnipa a wɔayi wɔn se wɔnhwε asɔredan no ho asiesie no nsa. Na wɔde atua adwumayεfo a

wobesiesie AWURADE Asoredan no ho ka. <sup>6</sup> Echo behia se wɔbɛfa nnua adwumfo, adansifo ne abohyehyɛfo. Afei, ma wɔnto nnua ne abo a wɔatwa a wɔde besiesie asoredan no. <sup>7</sup> Nanso echo nhia se adansi no sohwɛfo bebu sika a wɔn nsa bɛka no ho akontaa, efise wɔye nokwafo.”

### *Helkia Kohuu Onyankopɔn Mmara No*

<sup>8</sup> ɔsɔfopanyin Hilkia ka kyereɛ asennii kyereɛwfo Safan se, “Mahu Mmara Nhoma no wɔ AWURADE Asoredan mu hɔ.” Na Hilkia de nhoma mmobɔwee no maa Safan, na ɔkenkanee. <sup>9</sup> Safan san kɔɔ ɔhene no nkyɛn kɔkae se, “Wɔmpanyimfo no de sika a wogiyigye wɔ AWURADE asoredan no mu no ahye adwumayɛfo no ne sohwɛfo a wɔwɔ asoredan no ho no nsa.” <sup>10</sup> Safan san ka kyereɛ ɔhene no se, “ɔsɔfo Hilkia de nhoma mmobɔwee bi ama me.” Na Safan kenkan kyereɛ ɔhene no.

<sup>11</sup> Bere a ɔhene no tee nsem a εwɔ AWURADE Mmara Nhoma no mu no, ɔde ahometew sunsuan ne ntade mu. <sup>12</sup> Na ɔhyɛɛ ɔsɔfo Hilkia, Safan babarima Ahikam ne Mikaia babarima Akbor ne asennii kyereɛwfo Safan ne ɔhene fotufo Asaia se, <sup>13</sup> “Monkɔ asoredan no mu, na monkɔkasa nkyereɛ AWURADE mma me, mma nnipa no ne Yuda nyinaa. Mummisɛ no nsem a wɔakyerɛw agu nhoma mmobɔwee no a wahu no ho asem. AWURADE abufuwhyew aba yɛn so, efise yɛn agyanom anni nhoma yi mu nsem so. Enyɛ nea nhoma yi ka se yenyɛ no na yεyε.”

<sup>14</sup> Enti ɔsɔfo Hilkia, Ahikam, Akbor, Safan ne Asaia kɔɔ Yerusalem Fa Foforo Misne kohuu odiyifo Hulda. Na ɔyɛ Tikwa babarima Salum yere, a na ɔyɛ Harhas a ɔhwɛ ntade adaka

a εως asɔredan mu so no nso nena. <sup>15</sup> Oka kyerεε wɔn se, "AWURADE, Israel Nyankopɔn akasa. Monkɔka nkyere onipa a ɔsoma a mo no se, <sup>16</sup> 'Sεnea AWURADE se ni: Mesee kuropɔn yi ne mu nnipa, senea makyerew wɔ nhoma mmobɔwee a mokenkan no mu no. <sup>17</sup> Efisε me nkurofo agyaw me, na wɔsom anyame huhuw, na biribiara a wɔayε no, ahyε me abufuw. M'abufuwhyw redεw wɔ ha, na εrennum.' <sup>18</sup> Na monkɔ Yudahene a ɔsoma a mo se monkɔhwehwε AWURADE no nkyen, na monka nkyere no se, Sεε na AWURADE, Israel Nyankopɔn, ka fa asem a motee mprempren no ho. <sup>19</sup> Wotee asem a meka de tiaa kuropɔn no ne emu nnipa no se, wɔbɛdome saa asase yi na ada mpan no, εyεε wo yaw, ma wobrεε wo ho ase AWURADE anim. Wode ahometew sunsuan wo ntade mu, suu wɔ m'anim ahonu mu. Enti nokware, AWURADE se, 'mate wo sufre. <sup>20</sup> Amanehunu a mehyεε ho bɔ de tiaa kuropɔn yi no bεba wo wu ne wusie akyi. Worenhu amane a mede bεba kuropɔn yi so no.'"

Enti wɔsan de ne nkra no kɔmaa ɔhene no.

## 23

### *Yosia Gyidisom Mu Nsakrae*

<sup>1</sup> Afei, ɔhene no frεε Yuda ne Yerusalem mpanyimfo nyinaa. <sup>2</sup> Na ɔhene no ne Yuda ne Yerusalem manfo ne asɔfo ne adiyifo a efi akumaa so kosi ɔkεε so, foro kɔɔ AWURADE Asɔredan no mu. Ehɔ na ɔhene no kenkan Apam Nhoma a wɔahu wɔ AWURADE Asɔredan mu hɔ no nyinaa kyerεε wɔn. <sup>3</sup> ɔhene no tenaa

beae bi a εkyere ne tumi wɔ afadum no ho, hyεε apam no mu den bio wɔ AWURADE anim. ɔhyεε bɔ se, ofi ne koma ne ne kra nyinaa mu bedi AWURADE mmara nsɛm, ahyεde ne mmara nyinaa so. ɔfaa saa ɔkwan yi so sii apam no mu nhyeheyε ahorow a na wɔakyerεw wɔ nhoma no mu no nyinaa so dua, maa nnipa no nyinaa hyεε bɔ se wobedi so.

<sup>4</sup> Afei, ɔhene hyεε ɔsɔfopanyin Hilkia ne asɔfo akunini ne asɔredan sohwεfo no nyinaa sε, wonyiyi asɔredan no mu nneεema a na wɔde som Baal ne Asera ne wim atumfo no nyinaa mfi hɔ. ɔhene no ma wɔhyew ne nyinaa wɔ Kidron bon a εwɔ Yerusalem mfikyiri no mu, soaa ne nsɔ de kɔɔ Bet-El. <sup>5</sup> ɔpam abosom akɔmfo a Yuda ahemfo a wodii kan no yii wɔn no nyinaa, efise na wɔhyew nnuhuam wɔ Yuda abosomfi nyinaa mu a mpo, na εreyε akodu Yerusalem kurom. Wɔhyew nnuhuam maa Baal ne owia, ɔsram ne nsoromma ne wim atumfo. <sup>6</sup> ɔhene no tuu Asera dua\* no fii Awurade asɔredan mu, de kɔɔ Yerusalem mfikyiri wɔ Kidron bon mu hɔ kɔhyew no. Afei, ɔyam dua no muhumuhu, kɔtow ne m futuma no guu amusiei. <sup>7</sup> Odwiriw nsɔree so nguamanfo adan a na εwɔ AWURADE Asɔredan no mu no, faako a na mmea no nwen nkatahotam, de kata Asera dua no ho no nyinaa gui.

<sup>8</sup> Yosia san de AWURADE asɔfo no a na wɔtete Yuda nkurow afoforo so no nyinaa baa Yerusalem. Efi Geba kosi Beer-Seba, ɔsεee εhɔ

---

\* **23:6** Hesekia sεee Asera dua, nanso Manase san sii dua no.

abosonnan no nyinaa. Saa beae no na na wɔhyew nnuhuam no. Obubuu abosonnan a εwɔ Yosua a na εyε Yerusalem amrado no pon ano no. Se obi rewura kuropɔn no mu a obehu saa pon no wɔ kuropɔn pon no benkum so. <sup>9</sup> Asɔfo a na wɔsɔm wɔ abosonnan no mu no, na wɔmma wɔn kwan mma wɔnsom wɔ AWURADE afɔremuka a εwɔ Yerusalem no so, nanso na wɔma wɔne asɔfo a aka no di brodo a mmɔkaw nni mu no.

<sup>10</sup> Afei, ψhene no sεee Tofet afɔremuka a na εwɔ Ben-Hinom bon no mu no nti, na obiara ntumi mfa ne babarima anaa ne babea mmɔ afɔre wɔ ogya mu wɔ so se afɔrebɔde a wɔde ma Molek bio. <sup>11</sup> Otutuu aρɔnkɔ sεso a wɔagu a esisi AWURADE Asoredan kwan no ano a Yuda ahemfo too din maa owia no nyinaa fii hɔ. Na ne nyinaa wɔwɔ adiwo a εben piamni bi a wɔfrɛ no Natan-Malek dan ho. Yosia hyew nteaseεnam a na wɔato din ama owia no.

<sup>12</sup> Yosia bubuu afɔremuka a Yuda ahemfo sisii wɔ ahemfi no atifi wɔ Ahas dan apampam no nyinaa. ψhene no bubuu afɔremuka a Manase sisii wɔ AWURADE Asoredan no adiwo abien hɔ no nyinaa gui. Odwiriw no pasapasa, too ne afabo no petee Kidron bon no mu. <sup>13</sup> ψhene no san guu abosonnan a εwɔ Yerusalem apuei fam no ne nea εwɔ Ζsεe Bεpɔw no anafo fam no. Saa beae no na Israelhene Salomo sisii abosonnan maa Astoret, a εyε Sidonfo bosom bɔne, ne Kemos, Moabfo bosom bɔne, ne Molek, Amonfo bosom bɔne. <sup>14</sup> Yosia dwiriw afadum kronkron no nyinaa gui, bubuu Asera nnua no. ψde nnipa nnompe guguu ne nyinaa so.

<sup>15</sup> ሽene no san bubuu afɔremuka a εѡ Bet-El abosonnan a Nebat babarima Yeroboam yee bere a odii Israel anim, de wɔn kɔɔ bɔne mu no. Yosia Yam abo no, ma ɛdan mfutuma, hyew Asera dua no. <sup>16</sup> Bere a Yosia retoto n'ani no, ohuu nna pii wɔ koko no nkyen mu. ሽhyee se wontu nnompe no, na ɔhyew ne nyinaa wɔ afɔremuka a εѡ Bet-El no so, de guu afɔremuka no ho fi. Eyi sii senea AWURADE nam Onyankopɔn nipa so hyee, bere a Yeroboam kogyinaa afɔremuka no ho wɔ afahye da no. Afei Yosia dan ne ho hwεε Onyankopɔn nipa a ɔhyee eyinom nyinaa ho nkɔm no da.

<sup>17</sup> Yosia bisae se, "Nkaedum ben na mihi no?"

Na nnipa a wɔwɔ kurow no mu no ka kyereεε no se, "Eyε Onyankopɔn nipa no a ofi Yuda a ɔhyee nkɔm faa dwuma a woadi mprempren wɔ afɔremuka a εѡ Bet-El ho no oboda."

<sup>18</sup> Yosia buae se, "Momma εnwɔ hɔ. Obiara mmfa ne nsa nka ne nnompe no." Eno nti, wɔanhyew ɔne odiyifo akwakoraa a ofi Samaria no nnompe.

<sup>19</sup> Na Yosia bubuu abosonnan no a εѡ Samaria no, senea ɔyεε wɔ Bet-El no. Israel ahemfo ahorow bi na wosisi de hyee AWURADE abufuw. <sup>20</sup> Okunkum nsɔree so akɔmfo no wɔ wɔn ankasa afɔremuka so, na ɔhyew nnipa nnompe wɔ afɔremuka ahorow no so, de guu ho fi. Akyiri no, ɔsan kɔɔ Yerusalem.

### *Yosia Di Twam Afahye*

<sup>21</sup> ሽene Yosia hyee nnipa no nyinaa se, "Εεε se mudi Twam Afahye ma AWURADE, mo Nyankopɔn, senea wɔakyerew wɔ Apam Nhoma no mu no." <sup>22</sup> Efi bere a atemmufo dii Israel so

mfe bebree a atwa mu wɔ Israel ne Yuda ahemfo so no, wonnii Twam Afahye no bi saa da. <sup>23</sup> Bere a ɔhene Yosia dii mfe dunwɔtwe wɔ akongua so no na wodii saa Twam Afahye yi wɔ Yerusalem maa AWURADE.

<sup>24</sup> Yosia tɔree samanfrɛfo ne adunsifo ne afi mu anyame ne ahonisom biara ase wɔ Yerusalem ne Yuda asase so baabiara. ɔyεε saa de dii mmara a wɔakyerew wɔ nhoma mmobɔwee a ɔsɔfo Hilkia kohu wɔ AWURADE Asɔredan mu no so. <sup>25</sup> ɔhene biara mmae a ɔte se Yosia a ɔde ne koma, ne kra ne n'ahooðen ama AWURADE na ɔnam so adi Mose mmara nyinaa so. Na ɔhene biara nso mmae a ɔte se ɔno.

<sup>26</sup> Nanso eyi nyinaa akyi no, AWURADE abufuw no dɛw tiaa Yuda, esiane bɔne akese a ɔhene Manase yee no. Eno nti, wanyi n'abufuwhyew no amfi wɔn so. <sup>27</sup> AWURADE kae se, "Mɛsse Yuda, senea messee Israel no. Mɛpam nnipa no afi m'anim, na mapo me kuropɔn Yerusalem ne Asɔredan a anka eεε se wɔhye me din anuonyam wɔ mu no."

<sup>28</sup> Yosia ahenni ho asɛm nkae ne dwuma a odii nyinaa no, wɔankyerew angu Yuda Ahemfo Abakɔsem Nhoma no mu ana?

<sup>29</sup> Bere a Yosia di hene no, Misraimhene Farao Neko kɔɔ Asubɔnten Eufrate ho kɔboaa Asiriahene. ɔhene Yosia de n'akofo tuu sa, kɔko tiaa no, nanso bere a wohyiaa wɔ Megido no, ɔhene Neko kum no. <sup>30</sup> Yosia asraafo mu mpanyimfo no de n'amu no too teaseεnam mu fii Megido, baa Yerusalem besiee no wɔ n'ankasa ɔboda mu. Na nnipa no sraa ne babarima Yehoahas ngo, sii no hene.

*Yehoahas Di Yudahene*

<sup>31</sup> Bere a Yehoahas dii hene no, na wadi mfe aduonu abiesa, na odii ade wɔ Yerusalem asram abiesa. Na ne na ye Yeremia a ofi Libna no babea a na ne din de Hamutal. <sup>32</sup> Ɔyεε bɔne wɔ AWURADE ani so, senea n'agyanom yee no pεrεεpε. <sup>33</sup> Farao Neko de Yehoahas too afiase wɔ Ribla wɔ Hamat asase so, senea εbεyε a, ḡrentumi nni hene wɔ Yerusalem. Afei, ḡhyεε sε Yuda ntua tow dwetε tɔn abiesa ne fa ne sikakɔkɔ kilogram aduasa anan sε sonkahiri. <sup>34</sup> Farao Neko de Eliakim a ɔyε Yosia babarima dii ade ma osii n'agya anan mu. Ɔsesaa Eliakim din frεε no Yehoiakim. Wɔde Yehoahas kɔ Misraim sε odeduani, na owui wɔ hɔ.

### *Yehoiakim Di Yudahene*

<sup>35</sup> Senea εbεyε a Yehoiakim benya dwetε ne sikakɔkɔ tow a Farao Neko regye no nti, otwitwaa tow maa Yudafo tuae. Obiara tuaa senea n'ahonya te.

<sup>36</sup> Bere a Yehoiakim dii ade no, na wadi mfirihyia aduonu anum, na odii ade wɔ Yerusalem mfe dubaako. Na ne na din de Sebuda a ɔyε Pedaia a ofi Ruma babea. <sup>37</sup> Ɔyεε bɔne wɔ AWURADE ani so, senea n'agyanom yee no.

## 24

<sup>1</sup> Yehoiakim ahenni mu no, Babiloniahene Nebukadnessar bεtow hyεε Yuda asase so. Yehoiakim maa ne nsa so, na otuaa tow maa no mfe abiesa, nanso ḡtew Nebukadnessar so atua.

<sup>2</sup> Na AWURADE somaa akofo fi Babilonia, Aram, Moab ne Amon, kɔko tiaa Yuda, sεee no, senea AWURADE nam n'adiyifo so hyεε ho nkɔm no.

<sup>3</sup> Saa amanehunu yi baa Yuda so, senea AWURADE

hyεε no, sεnea εbεyε a obeyi wɔn afi n'anim, esiane bɔne dodow a Manase yεε no nti, <sup>4</sup> a na mogya a edi bem a ohwie guu no ka ho bi. Efise ɔde mogya a edi bem fɔw Yerusalem dotoo; εno nti na AWURADE mpe se ɔde bεkyε.

<sup>5</sup> Yehoiakim ahenni ho nsɛm nkae ne dwuma a odii nyinaa no, wɔankyerew angu Yuda Ahemfo Abakɔsɛm Nhoma no mu ana? <sup>6</sup> Bere a Yehoiakim wui no, ne babarima Yehoiakyin na odii n'ade se ɔhene.

<sup>7</sup> Misraimhene ansan amma bio, efise na Babiloniahene afa nsase a anka na Misraimfo no agye no nyinaa, efi Misraim asuwa no so, kosi Asubɔnten Eufrate ho.

### *Yehoiakyin Di Yudahene*

<sup>8</sup> Bere a Yehoiakyin dii ade no, na wadi mfe dunwɔtwe, na odii hene wɔ Yerusalem asram abiesa. Na ne na yε Elnatan a ofi Yerusalem no babea Nehusta. <sup>9</sup> Yehoiakyin yεε bɔne wɔ AWURADE ani so, sεnea n'agya yεε no ara pε.

<sup>10</sup> Yehoiakyin ahenni mu no, Babiloniahene Nebukadnessar asraafo mu mpanyimfo betuaa Yerusalem ano. <sup>11</sup> Otua no mu no, Nebukadnessar ankasa baa kuropɔn no mu. <sup>12</sup> Na ɔhene Yehoiakyin ne n'afotufo, atitiriw, mpanyimfo ne ɔhemmea de wɔn ho maa Babiloniafo. Nebukadnessar dii ade ne mfe awotwe so no, ɔkyeree Yehoiakyin de no too afiase. <sup>13</sup> Sεnea AWURADE aka dedaw no, Nebukadnessar tasee agyapade a εwɔ AWURADE Asoredan mu hɔ no ne ahemfi hɔ nyinaa. Wɔsεee sikakɔkɔɔ nnwetεbona a Israelhene Salomo de sisii asoredan mu hɔ no nyinaa. <sup>14</sup> ɔhene Nebukadnessar kyekyeree

nneduafo mpem du fii Yerusalem a ahenemma nyinaa ne asraafo akofo, adwumfo ne atomfo a wodi mu ka ho. Eno nti, ahiafo nko ara na ogyaw wɔn wɔ asase no so.

<sup>15</sup> Nebukadnessar faa ɔhene Yehoiakyin de no kɔɔ Babilonia se odeduani a ne yerenom ne ne mpanyimfo, ɔhemmea ne Yerusalem nnipa atitiriw ka ho. <sup>16</sup> ɔfaa akofo a wɔte apɔw no mpem ason, adwumfo ne atomfo apem a wɔn nyinaa ye mmaprima a wɔn ho ye den na wɔfata akodi. <sup>17</sup> Babiloniahene de Yehoiakyin wɔfa Matania dii ade se ɔhene foforo. ɔsesaa Matania din frɛɛ no Sedekia.

### *Sedekia Di Yudahene*

<sup>18</sup> Bere a Sedekia dii ade no, na wadi mfirihyia aduonu baako. Odii ade wɔ Yerusalem mfirihyia dubaako. Na ne na din de Hamutal a ɔye Yeremia a ofi Libna no babea. <sup>19</sup> Na Sedekia yee bɔne wɔ AWURADE ani so, senea Yehoiakim yee no. <sup>20</sup> AWURADE abufuw nti na eyinom nyinaa baa Yerusalem ne Yuda so, na akyiri no, oyii n'ani fii wɔn so.

### *Yerusalem Asehwe*

Afei, Sedekia sore tiaa Babiloniahene.

## 25

<sup>1</sup> Osram Tebet (beyε ɔpερɔn) da a eto so dunum wɔ Sedekia ahenni mfe akron so no, ɔhene Nebukadnessar dii n'akofo nyinaa anim, bεko tiaa Yerusalem. Wotwaa kuropɔn no ho hyiae. Wɔbɔbɔɔ mpampim wɔ kuropɔn no afasu ho. <sup>2</sup> Wɔkaa Yerusalem hyε kosii ɔhene Sedekia ahenni no mfe dubaako so.

<sup>3</sup> Eduu Tammus ḥṣram (bεγε Kitawonsa) da a eto so dunwotwe no, Sedekia ahenni mfe dubaako mu no, na ḥkōm a aba kuropōn no mu no ano aye den yiye, ama wōn aduan a aka no nyinaa asa. <sup>4</sup> Na kuropōn no fasu fa bi abu agu fam nti, asraafo no nyinaa yεε adwene sε, wobeguan afi kuropōn no mu. Nanso esiane sε na Babiloniafo atwa kuropōn no ho ahyia nti, wōtwen kosii anadwo, na woguan faa ḥpon a ᵥda afasu abien a εwā ḥhene no nturo no mu mu. Wōyεε ntēm faa wuramkwān de wōn ani kyereε Yordan bon no.

<sup>5</sup> Nanso Babiloniafo no tiw wōn, kōkyeree ḥhene no wō Yeriko tataw so, efise na ne mmarima no nyinaa aguan agya no saa bere no. <sup>6</sup> Wōde no bres Babiloniahene wō Ribla ma wobuu no aten. <sup>7</sup> Babiloniahene maa Sedekia de n'ani kann hwεε sε, wōrekunkum ne mmabarima nyinaa. Afei, wotutuu Sedekia ani, de kōbere nkōnsenkōnsōn guu no, na wōde no kōc Babilonia.

### *Wōsεε Asōredan No*

<sup>8</sup> Ab ḥṣram (bεγε ḥsannaa) da eto so dunan wō afe a εye Nebukadnessar mfe dunkron adedi mu no, Nebusaradan a ḥye awεmfo so panyin a ḥye Babiloniahene mpanyimfo no mu baako no kōc Yerusalem. <sup>9</sup> Ḫde ogya too AWURADE asōredan, ahemfi ne afi a εwā Yerusalem nyinaa mu. Ḫhyew ofi biara a edi mu. <sup>10</sup> Awεmfo so panyin no hwε maa Babilonia asraafo no bubuu Yerusalem afasu no. <sup>11</sup> Nebusaradan a ḥye awεmfo so panyin no kyekyeree wōn a wōkaa wō kuropōn no mu no, twaa wōn ne nnipa a

aka no ne asraafo a wɔdaa wɔn ho adi se wɔtaa Babiloniahene akyi no asu. <sup>12</sup> Na awɛmfo so panyin no maa mmɔborɔfo no mu bi tenaa Yuda, se wɔnhwɛ bobe mfuw ne mfuw foforo a eka ho no so.

<sup>13</sup> Babiloniafo no bubuu kɔbere mfrafrae afadum, nnyinasode a wotumi moma so ne kɔbere mfrafrae Po a na εwɔ AWURADE asɔredan mu, na wɔde kɔbere mfrafrae no nyinaa kɔɔ Babilonia. <sup>14</sup> Wɔtasee nkuku, sofi, akanea adabaw, nsanka ne kɔbere mfrafrae nneɛma ahorow a wɔde di wɔn afɔrebe ho dwuma wɔ Asɔredan no mu no nyinaa. <sup>15</sup> Nebusaradan a ɔyε awɛmfo so panyin no san tasee nkankyeet a wɔnoa mu ne nhweaseammo ne nkuku ne nkaka nkae a wɔde sikakɔkɔ ne dwete aye no nyinaa.

<sup>16</sup> Kɔbere mfrafrae a wonya fii afadum abien, nsu teaseɛnam ne Po no mu no, na emu yε duru dodo se wobetumi akari. Ḍhene Salomo bere so na ɔyεɛ saa nneɛma yi guu AWURADE Asɔredan mu. <sup>17</sup> Na afadum no mu biara sorokɔ yε anammɔn aduonu ason. Kɔbere mfrafrae no ntaaso a εdeda afadum no mu biara so no sorokɔ yε anammɔn ason ne fa a wɔde kɔbere mfrafrae no ara bi a εye otan seso ne atoa aba seso, atwa ho nyinaa ahyia de asiesie no. Na ɔfadum a eka ho no siesiebea ne no sesε.

<sup>18</sup> Awɛmfo no sahene no faa ɔsɔfopanyin Seraia, abediakyiri Sefania ne ɔponanoahwɛfo baasa no nnommum. <sup>19</sup> ɔfaa ɔpanyin a otua asraafo no ano, ne adehye afotufo baason fii nnipa a na wɔda so wɔ kuropɔn no mu no mu. Afei ɔfaa ɔkyerɛwfo a na ɔyε adwumayɛfo panyin ma wɔn a wɔfa nnipa ma wɔkɔyε asraafo wɔ asase no so, ne n'adwumayɛfo no mu aduosia

a ohuu wɔn wɔ kuropɔn no mu no. <sup>20</sup> ɔsahene Nebusaradan de wɔn nyinaa kɔɔ Babiloniahene anim wɔ Ribla. <sup>21</sup> ɔhene no ma wokunkum wɔn wɔ Ribla a εwɔ Hamat.

Enti wotwaa Yuda asu fii n'asase so.

### *Gedalia Hwe Yuda So*

<sup>22</sup> ɔhene Nebukadnessar yii Ahikam babarima Gedalia a na ɔyε Safan nena sε amrado a na ɔhwε nnipa a wɔkaa wɔ Yuda no so. <sup>23</sup> Bere a asraafodɔm so asahene ne wɔn mmarima tee sε Babiloniahene asi Gedalia amrado no, wɔkɔkaa ne ho wɔ Mispa. Nnipa a wɔkɔkaa ne ho no ne Netania babarima Ismael, Karea babarima Yohanan, Tanhumet a ofi Netofa babarima Seraia ne Maakatni babarima Yaasania ne wɔn mmarima nyinaa. <sup>24</sup> Gedalia dii nsew, kyereε wɔn sε, Babilonia mpanyimfo no amma hɔ ɔhaw so. Otuu wɔn fo se, "Munnsuro sε mobesom Babiloniafo. Montena asase no so na monsom Babiloniahene, na ebesi mo yiye."

<sup>25</sup> Tisri ɔsrām (bεyε Ebo ne Ahinime ntam) no mpaemu wɔ saa afe no mu no, Netania babarima Ismael a ɔyε Elisama nena a na ofi adehye abusua mu no de mmarima du kɔɔ Mispa, kokum Gedalia ne nnipa a na wɔka ne ho a wɔyε Yudafo ne Babiloniafo no nyinaa. <sup>26</sup> Afei, nnipa a wɔwɔ Yuda nyinaa, efi akumaa so, kosi ɔkεse so ne asraafodɔm asahene bɔɔ huboa, na woguan kɔɔ Misraim, efise na wosuro sε Babiloniafo no bεyε wɔn biribi.

### *Israel Adehye Anidaso*

<sup>27</sup> ɔhene Yehoiakyin dii mfe aduasa ason wɔ n'asutwa mu wɔ Babilonia no, Ewil-Merodak

bedii Babiloniahene. Ohuu Yehoiakyin mmɔbɔ,  
enti oyii no fii afiase saa afe no ara mu Adar  
ɔsram (beyɛ Oforisuo) da a ɛtɔ so abien. <sup>28</sup> ɔkaa  
abodwosem kyereɛ no, na ɔmaa no dibea a ewɔ  
anuonyam sen ahemfo a wɔne no wɔ Babilonia  
no de. <sup>29</sup> Enti Yehoiakin yii n'afiase ntade guu  
nkyɛn, na efi saa da no odidii wɔ ɔhene didipon  
so bere biara, kosii ne wuda. <sup>30</sup> Na Babiloniahene  
no san maa Yehoiakin sika bere ano bere ano, ma  
ɔde tuatua ne ho aka, kosii ne wuda.

**Biblica® Wonhia εho kwamma nhoma  
Akuapem Twi Nkwa Asem™  
Twi: Biblica® Wonhia εho kwamma nhoma  
Akuapem Twi Nkwa Asem™ (Bible)**

copyright © 2020 Biblica, Inc.

Language: Akuapem Twi (Twi)

Dialect: Akuapem

Translation by: Biblica, Inc.

This work is made available under the Creative Commons Attribution-ShareAlike 4.0 International License (CC BY-SA). To view a copy of this license, visit <http://creativecommons.org/licenses/by-sa/4.0> or send a letter to Creative Commons, PO Box 1866, Mountain View, CA 94042, USA.

Biblica® is a trademark registered by Biblica, Inc., and use of the Biblica® trademark requires the written permission of Biblica, Inc. Under the terms of the CC BY-SA license, you may copy and redistribute this unmodified work as long as you keep the Biblica® trademark intact. If you modify a copy or translate this work, thereby creating a derivative work, you must remove the Biblica® trademark. On the derivative work, you must indicate what changes you have made and attribute the work as follows: "The original work by Biblica, Inc. is available for free at [www.biblica.com](http://www.biblica.com) and [open.bible](https://open.bible)."

Notice of copyright must appear on the title or copyright page of the work as follows:

Biblica® Open Akuapem Twi Contemporary Bible™

Copyright © 1996, 2020 by Biblica, Inc.

"Biblica" is a trademark registered in the United States Patent and Trademark Office by Biblica, Inc. Used with permission.

You must also make your derivative work available under the same license (CC BY-SA).

If you would like to notify Biblica, Inc. regarding your translation of this work, please contact us at <https://open.bible/contact-us>.

Biblica® is a trademark registered in the United States Patent and Trademark Office by Biblica, Inc. and may not be included on

any derivative works. Unaltered content from open.bible must include the Biblica® trademark when distributed to others. If you alter the content in any way, you must remove the Biblica® trademark before distributing your work.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2021-04-09

---

PDF generated using Haiola and XeLaTeX on 22 Feb 2024 from source files dated 29 Jan 2022  
db9c1a75-e6f7-5999-979b-02f8eb612f40